

सिरि उसहदेव सामिस्स णमो । सिरि गोडी - जिराउला - सब्बोदयपासणाहाणं णमो । नमोऽत्थुणं समणस्स भगवओ महइ महावीर वद्धमाण सामिस्स । सिरि गोयम-सोहम्माइ सब्ब गणहराणं णमो । सिरि सुगुरु-देवाणं णमो । **दसवेयालियसुत्तं १ पढमं दुमपुप्फियऽञ्जयणं ☆☆☆ १.** धम्मो मंगलमुक्किट्ठं अहिंसा संजमो तवो । देवा वि तं नमंसंति जस्स धम्मो सया मणो ॥ १ २. जहा दुमस्स पुप्फेसु भमरो आवियई रसं । न य पुप्फं किलामेइ सो य पीणेइ अप्पयं ॥२॥ ३. एमेए समणा मुत्ता जे लोए संति साहुणो । विहंगमा व पुप्फेसु दाण-भत्तेसणे रया ॥३॥ ४. वयं च वित्तिं लब्भामो न य कोइ उवहम्मई । अहागडेसु रीयंते पुप्फेसु भमरा जहा ॥४॥ ५. महुकारसमा बुद्धा जे भवंति अणिस्सिया । नाणापिंडिरया दंता तेण वुच्चंति साहुणो ॥५॥ त्ति बेमि ॥ **☆☆☆ ॥१॥**

२ बिइयं सामणपुव्वगऽञ्जयणं ☆☆☆ ६. कहं नु कुज्जा सामणं जो कामे न निवारए । पए पए विसीयंतो संकप्पस्स वसं गओ ? ॥१॥ ७. वत्थ-गंधमलंकारं इत्थीओ सयणाणि य । अच्छंदा जे न भुंजंति न से चाइ त्ति वुच्चइ ॥२॥ ८. जे य कंते पिए भोए लद्धे विप्पिट्ठि कुव्वई । साहीणे चयई भोए से हु चाइ त्ति वुच्चई ॥३॥ ९. समाए पेहाए परिव्वयंतो, सिया मणो निस्सरई बहिद्धा । न सा महं नो वि अहं पि तीसे, इच्चेव ताओ विणएज्ज रागं ॥४॥ १०. आयावयाही चय सोगुमल्लं, कामे कमाही कमियं खु दचक्खं । छिंदाहि दोसं विणएज्ज रागं, एवं सुही होहिसि संपराए ॥५॥ ११. पक्खंदे जलियं जोइं धूमकेउं दुरासयं । नेच्छंति वंतयं भोत्तुं कुले जाया अगंधणे ॥६॥ १२. धिरत्थु ते जसोकामी जो तं जीवियकारणा । वंतं इच्छसि आवेउं सेयं ते मरणं भवे ॥७॥ १३. अहं च भोगरायस्स तं च सि अंधगवण्हिणो । मा कुले गंधणा होमो संजमं निहुओ चर ॥८॥ १४. जइ तं काहिसि भावं जा जा दच्छिसि नारिओ ॥ वायाइद्धो व्व हडो अट्ठियप्पा भविस्ससि ॥९॥ १५. तीसे सो वयणं सोच्चा संजयाए सुभासियं । अंकुसेण जहा नागो धम्मो संपडिवाइओ ॥१०॥ १६. एवं करंति संबुद्धा पंडिया पवियक्खणा । विणियट्ठंति भोगेसु जहा से पुरिसोत्तमो ॥११॥ त्ति बेमि ॥२॥ **☆☆☆ ३ तइयं खुड्डियायारकहऽञ्जयणं ☆☆☆ १७.** संजमे सुट्ठियप्पाणं विप्पमुक्काण ताइणं । तेसिमयमणाइणं निग्गंथाणं महेसिणं ॥१॥ १८. उद्देसियं १ कीयगडं २ नियागं ३ अभिहडाणि ४ य । राइभत्ते ५ सिणाणे ६ य गंध ७ मल्ले ८ य वीयणे ९ ॥२॥ १९. सन्निही १० गिहिमत्ते ११. य रायपिंडे किमिच्छए १२ । संबाहण १३ दंतपहोयणा १४ य, संपुच्छण १५ देहपलोयणा १६ य ॥३॥ २०. अट्ठावए १७ य नाली य १८ छत्तस्स य धारणट्ठाए १९ । तेगिच्छं २० पाहणा पाए २१ समारंभं च जोइणो २२ ॥४॥ २१. सेज्जायरपिंडं २३ च आसंदी २४ पलियंकए २५ । गिहंतरनिसेज्जा २६ य गायस्सुव्वट्ठणाणि २७ य ॥५॥ २२. गिहिणो वेयावडियं २८ जा य आजीववत्तिया २९ । तत्तानिव्वुडभोइतं ३० आउरस्सरणाणि ३१ य ॥६॥ २३. मूलए ३२ सिंगबेरे ३३ य उच्छुरखंडे अणिव्वुहे ३४ । कंदे ३५ मूले ३६ सच्चित्ते फले ३७ बीए य आमए ३८ ॥७॥ २४. सोवच्चले ३९ सिंधवे लोणे ४० रुमालोणे य आमए ४१ । सामुद्दे ४२ पंसुखारे ४३ य कालालोणे य आमए ४४ ॥८॥ २५ धूवणे ४५ त्ति वमणे ४६ य वत्थीकम्म ४७ विरेयणे ४८ । अंजणे ४९ दंतवणे ५० य गायाभंग ५१ विभूसणे ५२ ॥९॥ २६. सब्बमेयमणाइणं निग्गंथाण महेसिणं । संजमम्मि य जुत्ताणं लहुभूयविहारिणं ॥१०॥ २७. पंचासवपरिन्नाया तिगुत्ता छसु संजया । पंजनिग्गहणा धीरं निग्गंथा उज्जुदंसिणो ॥११॥ २८. आयावयंति गिम्हेसु हेमंतेसु अवाउडा । वासासु पडिसंलिणा संजया सुसमाहिया ॥१२॥ २९. परीसहरिउदंता धुयमोहा जिइंदिया । सब्बदुक्खप्पहीणट्ठा पक्कमंति महेसिणो ॥१३॥ ३०. दुक्कराइं करेत्ता णं दुस्सहाइं सहेत्तु य । केइत्थ देवलोगेसु केइ सिज्जंति नीरया ॥१४॥ ३१. खवेत्ता पुव्वकम्माइं संजमेण तवेण य । सिद्धिमग्गमणुप्पत्ता ताइणो परिनिव्वुड ॥१५॥ त्ति बेमि ॥ **☆☆☆ चउत्थं छज्जीवणियऽञ्जयणं ☆☆☆ ३२.** सुयं मे आउसं ! तेणं भगवया एवमक्खायं—इह खलु छज्जीवणिया नामऽञ्जयणं समणेणं भगवया महावीरेणं कासवेणं पवइया सुयक्खाया सुपणत्ता सेयं मे अहिज्जिउं अञ्जयणं धम्मपन्नत्ती ॥१॥ ३३. कयरा खलु सा छज्जीवणिया नामऽञ्जयणं समणेणं भगवया महावीरेणं कासवेणं पवेइया सुयक्खाया सुपन्नत्ता सेयं मे

सौजन्य :- पू. सा. श्री अ३एाप्रभाश्री म.सा. शिष्या पू. सा. श्री नंदीवर्धना श्री ७ म.सा. नी प्रेरएाथी अं. सौ. रतननेन कल्याणनागलपुर (क२७) धाटकोपर

अहिज्जिउं अज्झयणं धम्मपन्नत्ती ? ॥२॥ ३४. इमा खलु सा छज्जीवणिया णामऽज्झयणं समणेणं भगवया महावीरेणं कासवेणं पवेइया सुयक्खाया सुपन्नत्ता सेयं मे अहिज्जिउं अज्झयणं धम्मपन्नत्ती । तं जहा—पुढविकाइया १ आउकाइया २ तेउकाइया ३ वाउकाइया ४ वणस्सइकाइया ५ तसकाइया ६ ॥३॥ ३५. पुढवि चित्तमंतमक्खाया अणेगजीवा पुढो सत्ता अन्नत्थ सत्थपरिणएणं ॥४॥ ३६. आउ चित्तमंतमक्खाया अणेगजीवा पुढो सत्ता अन्नत्थ सत्थपरिणएणं ॥५॥ ३७. तेउ चित्तमंतमक्खाया अणेगजीवा पुढो सत्ता अन्नत्थ सत्थपरिणएणं ॥६॥ ३८. वाउ चित्तमंतमक्खाया अणेगजीवा पुढो सत्ता अन्नत्थ सत्थपरिणएणं ॥७॥ ३९. वणस्सइ चित्तमंतमक्खाया अणेगजीवा पुढो सत्ता अन्नत्थ सत्थपरिणएणं, तं जहा—अग्गबीया मूलबीयां पोरबीया खंधबीया बीयरुहा सम्मुच्छिमा तणलया वणस्सइकाइया सबीया, चित्तमंतमक्खाया अणेगजीवा पुढो सत्ता अन्नत्थ सत्थपरिणएणं ॥८॥ ४०. से जे पुण इमे अणेगे बहवे तसा पाणा तं जहा—अंडया पोयया जराउया रसया संसेइमा सम्मुच्छिमा उब्भिया उववाइया जेसिं केसिंचि पाणाणं अभिक्कंतं पडिक्कंतं संकुचियं पसारियं रुयं भंतं तसियं पलाइयं, आगइ-गइविन्नाया, जे य कीड-पयंगा, जा य कुंधु-पिवीलिया, सव्वे बेइंदिया सव्वे तेइंदिया सव्वे चउरिंदिया सव्वे पंचेदिया सव्वे तिरिक्खजोणिया सव्वे नेरइया सव्वे मणुया सव्वे देवा पाणा परमाहम्मिया, एसो खलु छट्ठो जीवनिकाओ तसकाओ त्ति पवुच्चइ ॥९॥ ४१. इच्चेसिं छण्हं जीवनिकायाणं नेव सयं दंडं समारंभेज्जा, नेवऽच्चेहिं दंडं समारंभावेज्जा, दंडं समारंभंते वि अच्चे न समणुजाणेज्जा । जावज्जीवाए तिविहं तिविहेणं, मणेणं वायाए काएणं, न करेमि न कारवेमि करेणं पि अच्चं न समणुजाणामि, तस्स भंते ! पडिक्कमामि निंदामि गरहामि अप्पाणं वोसिरामि ॥१०॥ पुढविकाइए जीवे ण सद्वहति जो जिणेहि पण्णत्ते । अणभिगतपुण्ण-पावो ण सो उट्ठावणाजोग्गो ॥१॥ आउक्काइए जीवे ण सद्वहति जो जिणेहि पण्णत्ते । अणभिगतपुण्ण-पावो ण सो उट्ठावणाजोग्गो ॥२॥ तेउक्काइए जीवे ण सद्वहति जो जिणेहि पण्णत्ते । अणभिगतपुण्ण-पावो सो उट्ठावणाजोग्गो ॥३॥ वाउक्काइए जीवे ण सद्वहति जो जिणेहि पण्णत्ते । अणभिगतपुण्ण-पावो ण सो उट्ठावणाजोग्गो ॥४॥ वणस्सतिकाइए जीवे ण सद्वहति जो जिणेहि पण्णत्ते । अणभिगतपुण्ण-पावो ण सो उट्ठावणाजोग्गो ॥५॥ तसकाइए जीवे ण सद्वहति जो जिणेहि पण्णत्ते । अणभिगतपुण्ण-पावो ण सो उवट्ठावणाजोग्गो ॥६॥ पुढविकाइए जीवे सद्वहती जो जिणेहि पण्णत्ते । अभिगतपुण्ण-पावो सो हु उवट्ठावणे जोग्गो ॥७॥ आउक्काइए जीवे सद्वहती जो जिणेहि पण्णत्ते । अभिगतपुण्ण-पावो सो हु उवट्ठावणे जोग्गो ॥८॥ तेउक्काइए जीवे सद्वहती जो जिणेहि पण्णत्ते । अभिगतपुण्ण-पावो सो हु उवट्ठावणे जोग्गो ॥९॥ वाउक्काइए जीवे सद्वहती जो जिणेहि पण्णत्ते । अभिगतपुण्ण-पावो सो हु उवट्ठावणे जोग्गो ॥१०॥ वणस्सतिकाइए जीवे सद्वहती जो जिणेहि पण्णत्ते । अभिगतपुण्ण-पावो सो हु उवट्ठावणे जोग्गो ॥११॥ तसकाइए जीवे सद्वहती जो जिणेहि पण्णत्ते । अभिगतपुण्ण-पावो सो हु उवट्ठावणे जोग्गो ॥१२॥ ४२. पढमे भंते ! महव्वए पाणाइवायाओ वेरमणं । सव्वं भंते ! पाणाइवायं पच्चक्खामि, से सुहुमं वा बायरं वा तसं वा थावरं वा, नेव सयं पाणे अइवाएज्जा, नेवऽच्चेहिं पाणे अइवायावेज्जा, पाणे अइवायंते वि अच्चे न समणुजाणेज्जा । जावज्जीवाए तिविहं तिविहेणं, मणेणं वायाए काएणं, न करेमि न कारवेमि करेणं पि अच्चं न समणुजाणामि, तस्स भंते ! पडिक्कमामि निंदामि गरहामि अप्पाणं वोसिरामि । पढमे भंते ! महव्वए उवट्ठिओ मि सव्वाओ पाणाइवायाओ वेरमणं ॥११॥ ४३. अहावरे दोच्चे भंते ! महव्वए मुसावायाओ वेरमणं । सव्वं भंते ! मुसावायं पच्चक्खामि, से कोहा वा लोहा वा भया वा हासा वा । नेव सयं मुसं वएज्जा, नेवऽच्चेहिं मुसं वायावेज्जा, मुसं वयंते वि अच्चे न समणुजाणेज्जा । जावज्जीवाए तिविहं तिविहेणं, मणेणं वायाए काएणं, न करेमि न कारवेमि करेणं पि अच्चं न समणुजाणामि । तस्स भंते ! पडिक्कमामि निंदामि गरहामि अप्पाणं वोसिरामि । दोच्चे भंते ! महव्वए उवट्ठिओ मि सव्वाओ मुसावायाओ वेरमणं ॥१२॥ ४४. अहावरे तच्चे भंते ! महव्वए अदिन्नादाणाओ वेरमणं । सव्वं भंते ! अदिन्नादाणं पच्चक्खामि । से गामे वानगरे वा रच्चे वा अप्पं वा बहुं वा अणु वा थूलं वा चित्तमंतं वा अचित्तमंतं वा । नेव सयं अदिच्चं गेण्हेज्जा, नेवऽच्चेहिं अदिच्चं गेण्हावेज्जा, अदिच्चं गेण्हंते वि अच्चे न समणुजाणेज्जा । जावज्जीवाए तिविहं तिविहेणं, मणेणं वायाए काएणं न करेमि न कारवेमि करेणं पि अच्चं न समणुजाणामि, तस्स भंते ! पडिक्कमामि निंदामि गरहामि अप्पाणं वोसिरामि । तच्चे भंते ! महव्वए उवट्ठिओ मि सव्वाओ अदिन्नादाणाओ वेरमणं

॥१३॥ ४५. अहावरे चउत्थे भंते ! महव्वए मेहुणाओ वेरमणं । सव्वं भंते ! मेहुणं पच्चक्खामि, से दिव्वं वा माणुस्सं वा तिरिक्खजोणियं वा । नेव सयं मेहुणं सेवेज्जा, नेवऽन्नेहिं मेहुणं सेवावेज्जा, मेहुणं सेवंते वि अन्ने न समणुजाणेज्जा । जावज्जीवाए तिविहं तिविहेणं, मणेणं वायाए काएणं, न करेमि न कारवेमि करंतं पि अन्नं न समणुजाणामि, तस्स भंते ! पडिक्कमामि निंदामि गरहामि अप्पाणं वोसिरामि । चउत्थे भंते ! महव्वए उवट्ठिओ मि सव्वाओ मेहुणाओ वेरमणं ॥१४॥ ४६. अहावरे पंचमे भंते ! महव्वए परिग्गहाओ वेरमणं । सव्वं भंते ! परिग्गहं पच्चक्खामि, से अप्पं वा बहुं वा अणुं वा थूलं वा चित्तमंतं वा अचित्तमंतं वा । नेव सयं परिग्गहं परिगेण्हेज्जा, नेवऽन्नेहिं परिग्गहं परिगेण्हावेज्जा, परिग्गहं परिगेण्हंते वि अन्ने न समणुजाणेज्जा । जावज्जीवाए तिविहं तिविहेणं, मणेणं वायाए काएणं, न करेमि न कारवेमि करंतं पि अन्नं न समणुजाणामि, तस्स भंते ! पडिक्कमामि निंदामि गरहामि अप्पाणं वोसिरामि । पंचमे भंते ! महव्वए उवट्ठिओ मि सव्वाओ परिग्गहाओ वेरमणं ॥१५॥ ४७. अहावरे छट्ठे भंते ! वए राईभोयणाओ वेरमणं । सव्वे भंते ! राईभोयणं पच्चक्खामि, से असणं वा पाणं खाइमं वा साइमं वा । नेव सयं राइं भुंजेज्जा, नेवऽन्नेहिं राइं भुंजवेज्जा, राइं भुंजंते वि अन्ने न समणुजाणेज्जा । जावज्जीवाए तिविहं तिविहेणं, मणेणं वायाए काएणं, न करेमि न कारवेमि करंतं पि अन्नं न समणुजाणामि, तस्स भंते ! पडिक्कमामि निंदामि गरहामि अप्पाणं वोसिरामि । छट्ठे भंते ! वए उवट्ठिओ मि सव्वाओ राईभोयणाओ वेरमणं ॥१६॥ ४८. इच्चेइयाइं पंच महव्वयाइं राईभोयणवेरमणछट्ठाइं अत्तहियट्ठयाए उवसंपज्जित्ता णं विहरामि ॥१७॥ ४९. से भिक्खू वा भिक्खुणी वा संजय-विरय-पडिहय-पच्चक्खायपाव-कम्मे दिया वा राओ वा एगओ वा परिसागओ वा सुत्ते वा जागरमणे वा, से पुढविं वा भित्तिं वा सिलं वा लेलुं वा ससरक्खं वा कायं ससरक्खं वा वत्थं हत्थेण वा पाएण वा कट्ठेण वा कलिचेण वा अंगुलियाए वा सलगाए वा सलागहत्थेण वा नाऽऽलिहेज्जा न विलिहेज्जा न घट्ठेज्जा न भिद्वेज्जा, अन्नं नाऽऽलिहावेज्जा न विलिहावेज्जा न घट्ठावेज्जा न भिंदावेज्जा अन्नं आलिहंतं वा विलिहंतं वा घट्टंतं वा भिदंतं वा न समणुजाणेज्जा । जावज्जीवाए तिविहं तिविहेणं, मणेणं वायाए काएणं, न करेमि न कारवेमि करेते पि अन्नं न समणुजाणामि, तस्स भंते ! पडिक्कमामि निंदामि गरहामि अप्पाणं वोसिरामि ॥१८॥ ५०. से भिक्खू वा भिक्खुणि वा संजय-विरय-पडिहय-पच्चक्खायपाव-कम्मे दिया वा राओ वा एगओ वा परिसागओ वा सुत्ते वा जागरमणे वा, से उदगं वा ओसं वा हिमं वा महियं वा करंग वा हरतणुगं वा सुद्धोदगं वा उदओल्लं वा कायं उदओल्लं वा वत्थं ससिणिद्धं वा कायं ससिणिद्धं वा वत्थं नाऽऽमुसेज्जा न संफुसेज्जा न आवीलेज्जा न पवीलेज्जा न अक्खोडेज्जा न पक्खोडेज्जा न आयावेज्जा न पयावेज्जा, अन्नं नाऽऽमुसावेज्जा न संफुसावेज्जा न आवीलावेज्जा न पवीलावेज्जा न अक्खोडावेज्जा न पक्खोडावेज्जा न आयावेज्जा न पयावेज्जा, अन्नं आमसंतं वा संफुसंतं वा आवीलंतं वा पवीलंतं वा अक्खोडंतं वा पक्खोडंतं वा आयावंतं वा पयावंतं वा न समणुजाणेज्जा । जावज्जीवाए तिविहं तिविहेणं, मणेणं वायाए काएणं, न करेमि न कारवेमि करंतं पि अन्नं न समणुजाणामि, तस्स भंते ! पडिक्कमामि निंदामि गरहामि अप्पाणं वोसिरामि ॥१९॥ ५१. से भिक्खू वा भिक्खुणी वा संजय-विरय-पडिहय-पच्चक्खायपाव-कम्मे दिया वा राओ वा एगओ वा परिसागओ वा सुत्ते वा जागरमाणे वा से अगणिं वा इंगालं वा मुम्मुरं वा अच्चिं वा जालं वा अलायं वा सुद्धागणिं वा उक्कं वा, न उंजेज्जा न घट्ठेज्जा न उज्जालेज्जा न निव्वावेज्जा, अन्नं न उंजावेज्जा न घट्ठावेज्जा न उज्जालावेज्जा न निव्वावेज्जा, अन्नं उंजंतं वा घट्टंतं वा उज्जालंतं वा निव्वावंतं वा न समणुजाणेज्जा । जावज्जीवाए तिविहं तिविहेणं, मणेणं वायाए काएणं, न करेमि न कारवेमि करंतं पि अन्नं न समणुजाणामि, तस्स भंते ! पडिक्कमामि निंदामि गरहामि अप्पाणं वोसिरामि ॥२०॥ ५२. से भिक्खू वा भिक्खुणी वा संजय-विरय-पडिहय-पच्चक्खायपावकम्मे दिया वा राओ वा एगओ वा परिसागओ वा सुत्ते वा जागरमणे वा, से सिएण वा विहुयणेण वा तालियंटण वा पत्तेण वा पत्तभंगेण वा साहाए वा साहाभंगेण वा पिहुणेण वा पिहुणहत्थेण वा चेलेण वा चेलकण्णेण वा हत्थेण वा मुहेण वा अप्पणो वा कायं बाहिरं वा वि पोग्गलं न फूमेज्जा न वीएज्जा, अन्नं न फूमावेज्जा न वीयावेज्जा, अन्नं फूमंतं वा वीयंतं वा न समणुजाणेज्जा । जावज्जीवाए तिविहं तिविहेणं, मणेणं वायाए काएणं, न करेमि न कारवेमि करंतं पि अन्नं न समणुजाणामि, तस्स भंते ! पडिक्कमामि निंदामि गरहामि अप्पाणं वोसिरामि ॥२१॥ ५३. से भिक्खू वा भिक्खुणी वा संजय-विरय-पडिहय-पच्चक्खायपावकम्मे

दिया वा राओ वा एगओ वा परिसागओ वा सुत्ते वा जागरमाणे वा, से बीएसु वा बीयपइट्टेसु वा रूढेसु वा रूढपइट्टेसु वा जाएसु वा जायपइट्टेसु वा हरिएसु वा हरियपइट्टेसु वा छिन्नेसु वा छिन्नपइट्टेसु वा सच्चित्तसु वा सच्चित्तकोलयडिनिस्सिएसु वा, न गच्छेज्जा न चिट्ठेज्जा न निसीएज्जा न तुयट्टेज्जा, अन्नं न गच्छावेज्जा न चिट्ठावेज्जा न निसीयावेज्जा न तुयट्टावेज्जा, अन्नं गच्छंतं वा चिट्ठंतं वा निसीयंतं वा तुयट्टंतं वा न समणुजाणेज्जा । जावज्जीवाए तिविहं तिविहेणं, मणेणं वायाए काएणं, न करेमि न कारवेमि करंतं पि अन्नं न समणुजाणामि, तस्स भंते ! पडिक्कमामि निंदामि गरहामि अप्पाणं वोसिरामि ॥२२॥ ५४. से भिक्खू वा भिक्खुणी वा संजय-विरय-पडिहय-पच्चक्खायपाव-कम्मे दिया वा राओ वा एगओ वा परिसागओ वा सुत्ते वा जागरमाणे वा, से कीडं वा पयंगं वा कुंथुं वा पिविलियं वा हत्थंसि वा पायंसि वा बाहुंसि वा ऊरुंसि वा उदरंसि वा सीसंसि वा वत्थंसि वा पडिग्गहंसि वा कंबलंसि वा पायपुंछणंसि वा रयहरणंसि वा गोच्छगंसि वा उंडगंसि वा दंडगंसि वा पीढगंसि वा फलगंसि वा सेज्जंसि वा संधारगंसि वा अन्नयरंसि वा तहप्पगारे उवगरणजाए तओ संजयामेव पडिलेहिय पडिलेहिय पमज्जिय पमज्जिय एगंतमवणेज्जा, नो णं संघायमावज्जेज्जा ॥२३॥ ५५. अजयं चरमाणो उ पाण-भूयाइं हिंसई । बंधई पावयं कम्मं तं से होइ कडुयं फलं ॥२४॥ ५६. अजयं चिट्ठमाणो उ पाण-भूयाइं हिंसई । बंधई पावयं कम्मं तं से होइ कडुयं फलं ॥२५॥ ५७. अजयं आसमाणो उ पाण-भूयाइं हिंसई । बंधई पावयं कम्मं सं से होइ कडुयं फलं ॥२६॥ ५८. अजयं सयमाणो उ पाण-भूयाइं हिंसई । बंधई पावयं कम्मं तं से होइ कडुयं फलं ॥२७॥ ५९. अजयं भुंजमाणो उ पाण-भूयाइं हिंसई । बंधई पावयं कम्मं तं से होइ कडुयं फलं ॥२७॥ ६०. अजयं भासमाणो उ पाण-भूयाइं हिंसई । बंधई पावयं कम्मं तं से होइ कडुयं फलं ॥२७॥ ६१. कंहं चरे ? कंहं चिट्ठे ? कहमासे ? कंहं सए ? । कंहं भुंजंतो भासंतो पावं कम्मं न बंधई ? ॥३०॥ ६२. जयं चरे जयं चिट्ठे जयमासे जयं सए । जयं भुंजंतो भासंतो पावं कम्मं न बंधई ॥३१॥ ६३. सव्वभूयऽप्पभूयस्स सम्मं भूयाइं पासाओ । पिहियासवस्स दंतस्स पावं कम्मं न बंधई ॥३२॥ ६४. पढमं नाणं तओ दया एवं चिट्ठइ सव्वसंजए । अन्नाणी किं काही ? किं वा नाहिइ छेय पावगं ? ॥३३॥ ६५. सोच्चा जाणइ कल्लाणं सोच्चा जाणइ पावगं । उभयं पि जाणई सोच्चा जं छेयं तं समायरे ॥३४॥ ६६. जो जीवे वि न याणति अजीवे वि न याणति । जीवाऽजीवे अयाणंतो कह सो नाहिइ संजमं ? ॥३५॥ ६७. जो जीवे वि वियाणति अजीवे वि वियाणति । जीवाऽजीवे वियाणंतो सो हु नाहिइ संजमं ॥३६॥ ६८. जया जीवमजीवे य दो वि एए वियाणई । तया गइं बहुविहं सव्वजीवाण जाणई ॥३७॥ ६९. जया गइं बहुविहं सव्वजीवाण जाणाई । तया पुण्णं च पावं च बंधं मोक्खं च जाणई ॥३८॥ ७०. जया पुण्णं च पावं च बंधं मोक्खं च जाणाई । तया निव्विंदए भोए जे दिव्वे जे य माणुसे ॥३९॥ ७१. जया निव्विंदए भोए जे दिव्वे जे य माणुस्से । तया चयइ संजोगं सऽब्भित्तरबाहिरं ॥४०॥ ७२. जया चयइ संजोगं सऽब्भित्तर-बाहिरं । तया मुंडे भवित्ताणं पव्वइए अणगारियं ॥४१॥ ७३. जया मुंडे भवित्ताणं पव्वइए अणगारियं । तया संवरमुक्कट्टं धम्मं फासे अणुत्तरं ॥४२॥ ७४. जया संवरमुक्कट्टं धम्मं फासे अणुत्तरं । तया धुणइ कम्मरयं अबोहिकलुसं कडं ॥४३॥ ७५. जया धुणइ कम्मरयं अबोहिकलुसं कडं । तया सव्वत्तगं नाणं दंसणं चाभिगच्छई ॥४४॥ ७६. जया सव्वत्तगं नाणं दंसणं चाभिगच्छई । तया लोगमलोगं च जिणो जाणइ केवली ॥४५॥ ७७. जया लोगमलोगं च जिणो जाणइ केवली । तया जोगे निरुंभित्ता सेलेसिं पडिवज्जई ॥४६॥ ७८. जया जोगे निरुंभित्ता सेलेसिं पडिवज्जई । तया कम्मं खवित्ताणं सिद्धिं गच्छइ नीरओ ॥४७॥ ७९. जया कम्मं खवित्ताणं सिद्धिं गच्छइ नीरओ । तया लोगमत्थयत्थो सिद्धो भवइ सासओ ॥४८॥ ८०. सुहसायगस्स समरस्स सायाउलगस्स निगामसाइस्स । उच्छोलणापहोइस्स दुलहा सोगइ तारिसगस्स ॥४९॥ ८१. तवोगुणपहाणस्स उज्झुमइ-खंति-संजमरयस्स । परीसहे जिणंतस्स सुलहा सोगइ तारिसगस्स ॥५०॥ पच्छा वि ते पयाया खिप्पं गच्छंति अमरभवणाइं । जेसिं पिओ तवो संजमो य खंती य बंधचेरं च ॥ ८२. इच्चेयं छज्जीवणियं सम्मद्दिट्ठी सया जए । दुलहं लभित्तु सामण्णं कम्मण्णा ण विराहेज्जासि ॥५१॥ ति बेमि ॥ ☆☆☆ ॥ चउत्थं छज्जीवणियऽज्झयणं ॥४॥ ५ पंचमं पिंडेसणऽज्झयणं ☆☆☆ पढमो उद्देसओ ☆☆☆ ८३. संपत्ते भिक्खकालम्मि असंभंतो अमुच्छिओ । इमेण

कमजोगेण भत्त-पाणं गवेसए ॥१॥ ८४. से गामे वा नगरे वा गोयरग्गओ मुणी । चरे मंदमणुव्विग्गो अव्वक्खित्तेण चेषसा ॥२॥ ८५. पुरओ जुगमायाए पेहमाणो महिं चरे । वज्जेतो बीय-हरियाइं पाणे य दग-मट्टियं ॥३॥ ८६. ओवायं विसमं खाणुं विज्जलं परिवज्जए । संकमेण न गच्छेज्जा विज्जमाणे परक्कमे ॥४॥ ८७. पवडंते व से तत्थ पक्खुलंते व संजए । हिंसेज्ज पाण-भूयाइं तसे अदुव थावरे ॥५॥ ८८. तम्हा तेण गच्छेज्जा संजए सुसमाहिए । सइ अन्नेण मग्गेण जयमेव परक्कमे ॥६॥ ८९. इंगालं छारियं रासिं तुसरसिं च गोमयं । ससरक्खेहिं पाएहिं संजओ तं न अक्कमे ॥७॥ ९०. न चरेज्ज वासे वासंते महियाए व पडंतिए । महावाए व वायंते तिरिच्छसंपाइमेसु वा ॥८॥ ९१. न चरेज्ज वेससामंते बंभचेरवसाणुए । बंभयारिस्स दंतस्स होज्जा तत्थ विसोत्तिया ॥९॥ ९२. अणायणे चरंतस्स संसग्गीए अभिक्खणं । होज्ज वयाणं पीला सामणम्मि य संसओ ॥१०॥ ९३. तम्हा एयं वियाणित्ता दोसं दोग्गइवड्डणं । वज्जए वेससामंतं मुणी एगंतमस्सिए ॥११॥ ९४. साणं सूयं गाविं दित्तं गोणं हयं गयं । संडिब्भं कलहं जुब्धं दूरओ परिवज्जए ॥१२॥ ९५. अणुन्नए नावणए अप्पहिट्ठे अणाउले । इंदियाइं जहाभागं दमइत्ता मुणी चरे ॥१३॥ ९६. दवदवस्स न गच्छेज्जा भासमाणो य गोयरे । हंसतो नाभिगच्छेज्जा कुलं उच्चावयं सया ॥१४॥ ९७. आलोयं थिग्गलं दारं संधिं दगभवणाणि य । चरंतो न विणिज्झाए संकट्टाणं विवज्जए ॥१५॥ ९८. रण्णो गहवईणं च रहस्साऽऽरक्खियाणि य । संकिलेसकरं ठाणं दूरओ परिवज्जए ॥१६॥ ९९. पडिकुट्टकुलं न पविसे मामगं परिवज्जए । अचियत्तकुलं न पविसे चियत्तं पविसे कुलं ॥१७॥ १००. साणी-पावारपिहियं अप्पणा नावपंगुरे । कवाडं नो पणोल्लेज्जा ओग्गहं सि अजाइया ॥१८॥ १०१. गोयरग्गपविट्ठो उ वच्च-मुत्तं न धारए । ओगासं फासुयं नच्चा अणुन्नविय वोसिरे ॥१९॥ १०२. नीयदुवारं तमसं कोट्टगं परिवज्जए । अचक्खुविसओ जत्थ पाणा दुप्पडिलेहगा ॥२०॥ १०३. जत्थ पुप्फइं बीयाइं विप्पइण्णाइं कोट्टए । अहुणोवलित्तं ओल्लं दट्ठणं परिवज्जए ॥२१॥ १०४. एलगं दारगं साणं वच्छगं वा वि कोट्टए । उल्लंघिया न पविसे विऊहित्ताण व संजए ॥२२॥ १०५. असंसत्तं पलोएज्जा नाइदूरावलोयए । उप्फुल्लं न विणिज्झाए नियट्ठेज्ज अयंपिरो ॥२३॥ १०६. अइभूमिं न गच्छेज्जा गोयरग्गओ मुणी । कुलस्स भूमिं जाणित्ता मियं भूमि परक्कमे ॥२४॥ १०७. तत्थेव पडिलेहेज्जा भूमिभागं वियक्खोणो । सिणाणस्स य वच्चस्स संलोगं परिवज्जए । १०८. दग-मट्टियआयाणे बीयाणे हरियाणि य । परिवज्जेतो चिट्ठेज्जा सव्विंदियसमाहिए ॥२६॥ १०९. तत्थ से चिट्ठमाणस्स आहरे पाण-भोयणं । अकप्पियं न गेणहेज्जा पडिगाहेज्जा कप्पियं ॥२७॥ ११०. आहरंती सिया तत्थ परिसाडेज्जा भोयणं । दैतियं पडियाइक्खे न मे कप्पइ तारिसं ॥२८॥ १११. सम्मइमाणी पाणाणि बीयाणि हरियाणी य । असंजमकरिं नच्चा तारिसं परिवज्जए ॥२९॥ ११२. साहट्टु निक्खित्ताणं सच्चित्तं घट्टियाण य । तहेव समणट्टाए उदगं संपणोल्लिया ॥३०॥ ११३. आगाहइत्ता चलइत्ता आहरे पाण-भोयणं । दैतियं पडियाइक्खे न मे कप्पइ तारिसं ॥३१॥ ११४. पुरेकम्मेण हत्थेण दव्वीए भायणेण वा । दैतियं पडियाइक्खे न मे कप्पइ तारिसं ॥३२॥ ११५. उदओल्लेण हत्थेण दव्वीए भायणेण वा । दैतियं पडियाइक्खे न मे कप्पइ तारिसं ॥३३॥ ११६. ससिणद्धेण हत्थेण दव्वीए भायणेण वा । दैतियं पडियाइक्खे न मे कप्पइ तारिसं ॥३४॥ ११७. ससरक्खेण हत्थेण दव्वीए भायणेण वा । दैतियं पडियाइक्खे न मे कप्पइ तारिसं ॥३५॥ ११८. मट्टियागतेण हत्थेण दव्वीए भायणेण वा । दैतियं पडियाइक्खे न मे कप्पइ तारिसं ॥३६॥ ११९. ऊसगतेण हत्थेण दव्वीए भायणेण वा । दैतियं पडियाइक्खे न मे कप्पइ तारिसं ॥३७॥ १२०. हरितालगतेण हत्थेण दव्वीए भायणेण वा । दैतियं पडियाइक्खे न मे कप्पइ तारिसं ॥३८॥ १२१. हिंगुलुयगतेण हत्थेण दव्वीए भायणेण वा । दैतियं पडियाइक्खे न मे कप्पइ तारिसं ॥३९॥ १२२. मणोसिलागतेण हत्थेण दव्वीए भायणेण वा । दैतियं पडियाइक्खे न मे कप्पइ तारिसं ॥४०॥ १२३. अंजणगतेण हत्थेण दव्वीए भायणेण वा । दैतियं पडियाइक्खे न मे कप्पइ तारिसं ॥४१॥ १२४. लोणगतेण हत्थेण दव्वीए भायणेण वा । दैतियं पडियाइक्खे न मे कप्पइ तारिसं ॥४२॥ १२५. गेरुयगतेण हत्थेण दव्वीए भायणेण वा । दैतियं पडियाइक्खे न मे कप्पइ तारिसं ॥४३॥ १२६. वण्णियगतेण हत्थेण दव्वीए भायणेण वा । दैतियं पडियाइक्खे न मे कप्पइ तारिसं ॥४४॥ १२७. सेडियगतेण हत्थेण दव्वीए भायणेण वा । दैतियं पडियाइक्खे न मे कप्पइ तारिसं ॥४५॥ १२८. सोरट्टियगतेण हत्थेण दव्वीए भायणेण वा । दैतियं पडियाइक्खे न मे कप्पइ तारिसं ॥४६॥ १२९. पिट्ठगतेण हत्थेण दव्वीए

भायणेण वा । दैतियं पडियाइक्खे न मे कप्पइ तारिसं ॥४७॥ १३०. कुक्कुसगतेण हत्थेण दव्वीए भायणेण वा । दैतियं पडियाइक्खे न मे कप्पइ तारिसं ॥४८॥ १३१. उक्कुट्टगतेण हत्थेण दव्वीए भायणेण वा । दैतियं पडियाइक्खे न मे कप्पइ तारिसं ॥४९॥ १३२. असंसद्वेण हत्थेण दव्वीए भायणेण वा । दिज्जमाणं न इच्छेज्जा पच्छकम्मं जहिं भवे ॥५०॥ १३३. संसद्वेण हत्थेण दव्वीए भायणेण वा । दिज्जमाणं पडिच्छेज्जा जं तत्थेसणियं भवे ॥५१॥ १३४. दोणहं तु भुंजमाणानं एगो तत्थ निमंतए । दिज्जमाणं न इच्छेज्जा छंदं से पडिलेहए ॥५२॥ १३५. दोणहं तु भुंजमाणानं दो वि तत्थ निमंतए । दिज्जमाणं पडिच्छेज्जा जं तत्थेसणियं भवे ॥५३॥ १३६. गुव्विणीए उवन्नत्थं विविहं पाण-भोयणं । भुज्जमाणं विवज्जेज्जा भुत्तसेसं पडिच्छए ॥५४॥ १३७. सिया य समणट्ठाए गुव्विणी कालमासिणी । उट्ठिया वा निसीएज्जा निसन्ना वा पुणुट्ठए ॥५५॥ १३८. तं भवे भत्त-पाणं तु संजयाण अकप्पियं । दैतियं पडियाइक्खे न मे कप्पइ तारिसं ॥५६॥ १३९. थणगं पज्जेमाणी दारगं वा कुमारियं । तं निक्खिवित्तु रोयंतं आहरे पाण-भोयणं ॥५७॥ १४०. तं भवे भत्त-पाणं तु संजयाण अकप्पियं । दैतियं पडियाइक्खे न मे कप्पइ तारिसं ॥५८॥ १४१. जं भवे भत्त-पाणं तु कप्पाऽकप्पम्मि संकियं । दैतियं पडियाइक्खे न मे कप्पइ तारिसं ॥५९॥ १४२. दगवारएण पिहियं नीसाए पीढएण वा । लोढेण वा वि लेवेण सिलेसेण व केणई ॥६०॥ १४३. तं च उब्भिदिउं देज्जा समणट्ठाए व दायए । दैतियं पडियाइक्खे न मे कप्पइ तारिसं ॥६१॥ १४४. असणं पाणगं वा वि खाइमं साइमं तहा । जं जाणेज्ज सुणेज्जा वा दाणट्ठा पगडं इमं ॥६२॥ १४५. तं भवे भत्त-पाणं तु संजयाण अकप्पियं । दैतियं पडियाइक्खे न मे कप्पइ तारिसं ॥६३॥ १४६. असणं पाणगं वा वि खाइमं साइमं तहा । जं जाणेज्ज सुणेज्जा वा पुण्णट्ठा पगडं इमं ॥६४॥ १४७. तं भवे भत्त-पाणं तु संजयाण अकप्पियं । दैतियं पडियाइक्खे न मे कप्पइ तारिसं ॥६५॥ १४८. असणं पाणगं वा वि खाइमं साइमं तहा । जं जाणेज्जा सुणेज्जा वा वणिमट्ठा पगडं इमं ॥६६॥ १४९. तं भवे भत्त-पाणं तु संजयाण अकप्पियं । दैतियं पडियाइक्खे न मे कप्पइ तारिसं ॥६७॥ १५०. असणं पाणगं वा वि खाइमं साइमं तहा । जं जाणेज्ज सुणेज्जा वा समणट्ठा पगडं इमं ॥६८॥ १५१. तं भवे भत्त-पाणं तु संजयाण अकिप्पियं । दैतियं पडियाइक्खे न मे कप्पइ तारिसं ॥६९॥ १५२. उद्देसियं कीयगडं पूईकम्मं च आहडं । अज्झोयर पामिच्चं मीसजायं वज्जए ॥७०॥ १५३. उग्गमं से पुच्छेज्जा कस्सऽट्ठा ? केण वा कडं ? । सोच्चा निस्संकियं सुद्धं पडिगाहेज्ज संजए ॥७१॥ १५४. असणं पाणगं वा वि खाइमं साइमं तहा । पुप्फेसु हाज्ज उम्मीसं बीएसु हरिएसु वा ॥७२॥ १५५. तं भवे भत्त-पाणं तु संजयाण अकिप्पियं । दैतियं पडियाइक्खे न मे कप्पइ तारिसं ॥७३॥ १५६. असणं पाणगं वा वि खाइमं साइमं तहा । उदगम्मि होज्ज निक्खित्तं उत्तिंग-पणगेसु वा ॥७४॥ १५७. तं भवे भत्त-पाणं तु संजयाण अकप्पियं । दैतियं पडियाइक्खे न मे कप्पइ तारिसं ॥७५॥ १५८. असणं पाणगं वा वि खाइमं साइमं तहा । अगणिम्मि होज्ज निक्खित्तं तं च संघट्ठिया दए ॥७६॥ १५९. तं भवे भत्त-पाणं तु संजयाण अकिप्पियं । दैतियं पडियाइक्खे न मे कप्पइ तारिसं ॥७७॥ १६०. असणं पाणगं वा वि खाइमं साइमं तहा । अगणिम्मि होज्ज निक्खित्तं तं च उस्सक्किया दए ॥७८॥ १६१. तं भवे भत्त-पाणं तु संजयाण अकिप्पियं । दैतियं पडियाइक्खे न मे कप्पइ तारिसं ॥७९॥ १६२. असणं पाणगं वा वि खाइमं साइमं तहा । अगणिम्मि होज्ज निक्खित्तं तं च ओसक्किया दए ॥८०॥ १६३. तं भवे भत्त-पाणं तु संजयाण अकिप्पियं । दैतियं पडियाइक्खे न मे कप्पइ तारिसं ॥८१॥ १६४. असणं पाणगं वा वि खाइमं साइमं तहा । अगणिम्मि होज्ज निक्खित्तं तं च उज्जालिया दए ॥८२॥ १६५. तं भवे भत्त-पाणं तु संजयाण अकिप्पियं । दैतियं पडियाइक्खे न मे कप्पइ तारिसं ॥८३॥ १६६. असणं पाणगं वा वि खाइमं साइमं तहा । अगणिम्मि होज्ज निक्खित्तं तं च पज्जालिया दए ॥८४॥ १६७. तं भवे भत्त-पाणं तु संजयाण अकिप्पियं । दैतियं पडियाइक्खे न मे कप्पइ तारिसं ॥८५॥ १६८. असणं पाणगं वा वि खाइमं साइमं तहा । अगणिम्मि होज्ज निक्खित्तं तं च निव्वाविया दए ॥८६॥ १६९. तं भवे भत्त-पाणं तु संजयाण अकिप्पियं । दैतियं पडियाइक्खे न मे कप्पइ तारिसं ॥८७॥ १७०. असणं पाणगं वा वि खाइमं साइमं तहा । अगणिम्मि होज्ज निक्खित्तं तं च उस्सिंचिया दए ॥८८॥ १७१. तं भवे भत्त-पाणं तु संजयाण अकिप्पियं । दैतियं पडियाइक्खे न मे कप्पइ तारिसं ॥८९॥ १७२. असणं पाणगं वा वि खाइमं साइमं तहा । अगणिम्मि होज्ज निक्खित्तं तं च निस्सिंचिया दए ॥९०॥ १७३. तं भवे भत्त-पाणं तु संजयाण अकिप्पियं । दैतियं

पडियाइक्खे न मे कप्पइ तारिसं ॥९१॥ १७४. असणं पाणणं वा वि खाइमं साइमं तहा । अगणिम्मि होज्ज निक्खित्तं तं च ओवत्तिया दए ॥९२॥ १७५. तं भवे भत्त-पाणं तु संजयाण अकप्पियं । देतियं पडियाइक्खे न मे कप्पइ तारिसं ॥९३॥ १७६. असणं पाणणं वा वि खाइमं साइमं तहा । अगणिम्मि होज्ज निक्खित्तं तं च ओयारिया दए ॥९४॥ १७७. तं भवे भत्त-पाणं तु संजयाण अकप्पियं । देतियं पडियाइक्खे न मे कप्पइ तारिसं ॥९५॥ १७८. होज्ज कट्टं सिलं वा वि इट्ठालं वा वि एगया । ठवियं संकमट्ठाए तं चे होज्ज चलाचलं न मे कप्पइ तारिसं ॥९६॥ १७९. न तेण भिक्खू गच्छेज्जा दिट्ठो तत्थ असंजमो । गंभीरं झुसिरं चेव सव्विदियसमाहिए ॥९७॥ १८०. निस्सेणिं फलणं पीढं उस्सवित्ताणमारुहे । मंचं कीलं च पासायं समणट्ठाए व दावए ॥९८॥ १८१. दुरूहमाणी पवडेज्जा हत्थं पायं व लूसए । पुढविजीवे विहिंसेज्जा जे य तन्निस्सिया जगा ॥९९॥ १८२. एयारिसे महादोसे जाणिरुण महेसिणो । तम्हा मालोहडं भिक्खं न पडिगेण्हंति संजया ॥१००॥ १८३. कंदं मूलं पलंबं वा आमं चिन्नं च सन्निरं । तुंबागं सिंगबेरं च आमं परिवज्जए ॥१०१॥ १८४. तहेव सतुचुण्णाइं कोलचुण्णाइं आवणे । सक्कुलिं फाणियं पूयं अन्नं वा वि तहाविहं ॥१०२॥ १८५. विक्कायमाणं पसढं रएण परिफासियं । देतियं पडियाइक्खेन मे कप्पइ तारिसं ॥१०३॥ १८६. बहुअट्ठियं पोग्गलं अणिमिसं वा बहुकंटयं । अच्छियं तेंदुयं बिल्लं उच्छुखंडं च सिंबलिं ॥१०४॥ १८७. अप्पे सिया भोयणज्जाए बहुउज्झियधम्मए । देतियं पडियाइक्खे न मे कप्पइ तारिसं ॥१०५॥ १८८. तहेवुच्चावयं पाणं अदुवा वारधोवणं । संसेइमं चाउलोधगं अहुणाधोयं विवज्जए ॥१०६॥ १८९. जं जाणेज्जा चिराधोयं मईए दंसणेण वा । पडिपुच्छिरुण सोच्चा वा जं च निस्संकियं भवे ॥१०७॥ १९०. अजीवं परिणयं नच्चा पडिगाहेज्जा संजए । अह संकियं भवेज्जा आसाइत्ताण रोयए ॥१०८॥ १९१. थोवमासायणट्ठाए हत्थगम्मि दलाहि मे । मा मे अच्चंबिलं पूइं नालं तण्हं विणेत्तए ॥१०९॥ १९२. तं च अच्चंबिलं पूइं नालं तण्हं विणेत्तए । देतियं पडियाइक्खेन मे कप्पइ तारिसं ॥११०॥ १९३. तं च होज्ज अकामेणं विमणेण पडिच्छियं । तं अप्पणा न पिबे नो वि अन्नस्स दावए ॥१११॥ १९४. एगंतमवक्कमित्ता अचित्तं पडिलेहिया । जयं परिट्ठवेज्जा परिट्ठप्प पडिक्कमे ॥११२॥ १९५. सिया य गोयरग्गओ इच्छेज्जा परिभोत्तुयं । कोट्टगं भित्तिमूलं वा पडिलेहत्ताण फासुयं ॥११३॥ १९६. अणुत्तवेतु मेहावी पडिच्छन्नम्मि संवुडे । हत्थगं संपमज्जित्ता तत्थ भुजेज्ज संजए ॥११४॥ १९७. तत्थ से भुंजमाणस्स अट्ठियं कंटओ सिया । तण कट्टु सक्करं वा अन्नं वा वि तहाविहं ॥११५॥ १९८. तं उक्खिवित्तु न निखिवे आसएण न छट्ठए । हत्थेण तं गहेऊण एगंतमक्कमे ॥११६॥ १९९. गंतमवक्कमित्ता अचित्तं पडिलेहिया । जयं परिट्ठवेज्जा परिट्ठप्प पडिक्कमे ॥११७॥ २००. सिया य भिक्खु इच्छेज्जा सेज्जामागम्म भोत्तुयं । सपिंडपायमागम्म उंड्ढयं पडिलेहिया ॥११८॥ २०१. विणएण पविसित्ता सगासे गुरुणो मुणी । इरियावहियमायाय आगओ य पडिक्कमे ॥११९॥ २०२. आमोएत्ताण निस्सेसं अइयारं जहक्कमं । गमणाऽऽगमणे चेव भत्त-पाणे व संजए ॥१२०॥ २०३. उज्जुप्पणो अणुव्विग्गो अक्खित्तेण चेतसा । आलोए गुरुसगासे जं जहा गहियं भवे ॥१२१॥ २०४. न सम्ममालोइयं होज्जा पुव्विं पच्छा व जं कडं । पुणो पडिक्कमे तस्स वोसट्ठो चिंतए इमं ॥१२२॥ २०५. अहो ! जिणेहिं असावज्जा वित्ती साहूण देसिया । मोक्खसाहणहेउस्स साहुदेहस्स धारणा ॥१२३॥ २०६. नमोक्कारेण पारेत्ता करेत्ता जिणसंथवं । सज्झायं पट्ठवेत्ताणं वीसमेज्ज खणं मुणी ॥१२४॥ २०७. वीसमंतो इमं चित्ते हियमट्ठं लाभमट्ठिओ । जइ मे अणुग्गहं कुज्जा साहू ! होज्जामि तारिओ ॥१२५॥ २०८. साहवो तो चियत्तेणं निमंतेज्जं जहक्कमं । जइ तत्थ केइ इच्छेज्जा तेहिं सद्धिं तु भुंजए ॥१२६॥ २०९. अह कोई न इच्छेज्जा तओ भुंजेज्ज एगओ । आलोए भायणे साहू जयं अपरिसाडियं ॥१२७॥ २१०. तित्तगं व कडुयं व कसायं, अंबिलं व महुरं लवणं वा । एय लद्धमन्नट्ठपउत्तं महु-घयं व भुंजेज्ज संजए ॥१२८॥ २११. अरसं विरसं वा वि सूइयं व असूइयं । ओल्लं वा जइ वा सुक्कं मंथु-कुम्मासभोयणं ॥१२९॥ २१२. उप्पन्नं नाइहीलेज्जा अप्पं वा बहु फासुयं । मुहालद्धं मुहाजीवी भुंजेज्जा दोसवज्जियं ॥१३०॥ २१३. दुल्लहा उ मुहादाई मुहाजीवी वि दुल्लहा । मुहादाई मुहाजीवी दो वि गच्छंति सोग्गइं ॥१३१॥ ति बेमि ॥ ॥ **पिडेसणऽज्झयणे बीओ उद्देसओ** २१४. पडिग्गहं संलिहित्ताणं लेवमायाए संजए । दुगंधं वा सुगंधं वा सव्वं भुंजे न

छड्डुए ॥१॥ २१५. सेज्जा निसीहियाए समावन्नो य गोयरे । अयावयट्टा भोच्चा णं जइ तेण न संथरे ॥२॥ २१६. तओ कारणमुप्पन्ने भत्त-पाणं गवेसए । विहिणा पुव्ववुत्तेण इमेणं उत्तरेण य ॥३॥ २१७. कालेण निक्खमे भिक्खू कालेण य पडिक्कमे । अकालं च विवज्जेत्ता काले कालं समायरे ॥४॥ २१८. अकाले चरसि भिक्खू ! कालं न पडिलेहसि । अप्पाणं च किलामेसि अन्निवेसं च गरहसि ॥५॥ २१९. सइ काले चरे भिक्खू कुज्जा पुरिसकारियं । अलाभो त्ति न साएज्जा तवो त्ति अहियासए ॥६॥ २२०. तहेवुच्चावया पाणा भत्तट्टाए समागया । तउज्जुयं न गच्छेज्जा जयमेव परक्कमे ॥७॥ २२१. गोयरग्ग पविट्ठो उ न निसीएज्ज कत्थई । कहां च न पबंधेज्जा चिट्ठित्ताण व संजए ॥८॥ २२२. अग्गलं फलिहं दारं कवाडं वा वि संजए । अवलंबिया न चिट्ठेज्जा गोयरग्गओ मुणी ॥९॥ २२३. समणं माहणं वा वि किविणं वा वणीमगं । उवसंकमतं भत्तट्टा पाणट्टाए व संजए ॥१०॥ २२४. तं अइक्कमित्तु न पविसे न चिट्ठे चक्खुगोयरे । एगंतमवक्कमित्ता तत्थ चिट्ठेज्ज संजए ॥११॥ २२५. वणीमगस्स वा तस्स दायगस्सुभयस्स वा । अप्पत्तियं सिया होज्जा लहुत्तं पवयणस्स वा ॥१२॥ २२६. पडिसेहिए व दिन्ने वा तओ तम्मि नियत्तिए । उवसंकमेज्ज भत्तट्टा पाणट्टाए व संजए ॥१३॥ २२७. उप्पलं पउमं वा वि कुमुयं वा मगदंतियं । अन्नं वा पुप्फ सच्चित्तं तं च संलुचिया दए ॥१४॥ २२८. तारिसं भत्त-पाणं तु संजयाण अकप्पियं । देंतियं पडियाइक्खे न मे कप्पइ तारिसं ॥१५॥ २२९. उप्पलं पउमं वा वि कुमुयं वा मगदंतियं । अन्नं वा पुप्फ सच्चित्तं तं च सम्मद्विया दए ॥१६॥ २३०. तारिसं भत्त-पाणं तु संजयाण अकप्पियं । देंतियं पडियाइक्खे न मे कप्पइ तारिसं ॥१७॥ २३१. सालुयं वा विरालियं कुमुउप्पलनालियं । मुणालियं सासवनालियं उच्छुक्खंडं अनिव्वुडं ॥१८॥ २३२. तरुणं वा पवालं रुक्खस्स तणगस्स वा । अन्नस्स वा वि हरियस्स आमगं परिवज्जए ॥१९॥ २३३. तरुणियं वा छेवाडिं आमियं भज्जियं सइ । देंतियं पडियाइक्खे न मे कप्पइ तारिसं ॥२०॥ २३४. तहा कोलमणस्सिन्नं वेलुयं कासवनालियं । तिलप्पडगं नीमं आमगं परिवज्जए ॥२१॥ २३५. तहेव चाउलं पिट्ठं वियडं वा तत्तनिव्वुडं । तिलपिट्ठ पूइपिन्नागं आमगं परिवज्जए ॥२२॥ २३६. कविट्ठं माउलिंगं च मूलगं मूलगतियं । आमं असत्परिणयं मणसा वि न पत्थए ॥२३॥ २३७. तहेव फलमंथूणि बीयमंथूणि जाणिया । बिहेलगं पियालं च आमगं परिवज्जए ॥२४॥ २३८. समुदाणं चरे भिक्खू कुलं उच्चावयं सया । नीयं कुमइक्कम्म ऊसढं नामधारए ॥२५॥ २३९. अदीणो वित्तिमेसेज्जा न विसीएज्ज पंडिए । अमुच्छिओ भोयणम्मि मायन्ने एसणारए ॥२६॥ २४०. बहुं परघरे अत्थि विविहं खाइम-साइमं । न तत्थ पंडिओ कुप्पे इच्छा देज्ज परो न वा ॥२७॥ २४१. सयणाऽऽसण वत्थं वा भत्त-पाणं व संजए । अदेतस्स न कुप्पेज्जा पच्चक्खे वि य दीसओ ॥२८॥ २४२. इत्थियं पुरिसं वा वि डहरं वा महल्लगं । वंदमाणं न जाएज्जा नो य णं फरुसं वए ॥२९॥ २४३. जे न वंदे न से कुप्पे वंदिओ न समुक्कसे । एवमन्नेसमाणस्स सामणमणुचिट्ठई ॥३०॥ २४४. सिया एगइओ लब्धुं लोभेण विणिगूहई । मा मेयं दाइयं संतं दद्वुणं सयमायए ॥३१॥ २४५. अत्तट्टगुरुओ लुद्धो बहुं पावं पकुव्वई । दुत्तोसओ य से होइ नेव्वाणं च न गच्छई ॥३२॥ २४६. सिया एगइओ लब्धुं विविहं पाण-भोयणं । भद्दगं भद्दगं भोच्चा विवणं विरसमाहरे ॥३३॥ २४७. जाणंतु ता इमे समणा आययट्ठी अयं मुणी । संतुट्ठो सेवई पंतं लूहवित्ती सुतोसओ ॥३४॥ २४८. पूयणट्टा जसोकामी माण-सम्माणकामए । बहुं पसवई पावं मायासल्लं च कुव्वई ॥३५॥ २४९. सुरं वा मेरगं वा वि अन्नं वा मज्जगं रसं । ससक्खं न पिबे भिक्खू जसं सारक्खमप्पणो ॥३६॥ २५०. पियाएगइओ तेणो न मे कोइ वियाणइ । तस्स पस्सह दोसाइं नियडिं च सुणेह मे ॥३७॥ २५१. वड्ढई सोंडिया तस्स मायामोसं च भिक्खुणो । अयसो य अनिव्वाणं सययं च असाहुया ॥३८॥ २५२. निच्चुविग्गो जहा तेणो अत्तकम्महि दुम्मई । तारिसो मरणंते वि नाऽऽराहेइ संवरं ॥३९॥ २५३. आयरिए नाऽऽराहेइ समणे यावि तारिसो । गिहत्था वि णं गरहंति जेण जाणंति तारिसं ॥४०॥ २५४. एवं तु अगुणप्पेही गुणाणं च विवज्जए । तारिसो मरणंते वि नाऽऽराहेइ संवरं ॥४१॥ २५५. तवं कुव्वइ मेहावी पणीयं वज्जए रसं । मज्ज-प्पमायविरओ तवस्सी अइउक्कसो ॥४२॥ २५६. तस्स पस्सह कल्लाणं अणेगसाहुपूइयं । विउलं अत्थसंजुत्तं कित्तइस्सं सुणेह मे ॥४३॥ २५७. एवं तु गुणप्पेही अगुणाणं विवज्जए । तारिसो मरणंते वि आराहेइ संवरं ॥४४॥ २५८. आयरिए आराहेइ समणे यावि तारिसो । गिहत्था वि णं पूयंति जेण जाणंति तारिसं ॥४५॥ २५९. तवतेणे वइतेणे रूवतेणे य जे नरे । आयार-भावतेणे य कुव्वई देवकिब्बिसं ॥४६॥ २६०. लब्धूण वि देवतं उववन्नो

देवकिब्बिसे । तत्थावि से न याणाइ किं मे किच्चा इमं फलं ? ॥४७॥ २६१. तत्तो वि से चइत्ताणं लब्धिही एलमूयणं । नरयं तिरिक्खजोणिं वा बोही तत्थ सुदुल्लहा ॥४८॥ २६२. एयं च दोसं दद्वुणं नायपुत्तेण भासियं । अणुमायं पि मेहावी मायामोसं विवज्जे ॥४९॥ २६३. सिक्खिऊण मिक्खेसणसोहिं संजयाण बुद्धाण सगासे । तत्थ भिक्खु सुप्पणिहिइंदिए तिब्बलज्जगुणवं विहरेज्जासि ॥५०॥ ति बेमि ॥ ॥पिंडेसणाए बीओ उद्देसओ समत्तो **☆☆☆** ॥ पिंडेसणऽज्झयणं समत्तं ॥५॥

☆☆☆ ६ छट्ठं धम्म-ऽत्थ-कामऽज्झयणं ☆☆☆ २६४. नाण-दंसणसंपन्नं संजमे य तवे रयं । गणिमागमसंपन्नं उज्जाणम्मि समोसढं ॥१॥ २६५. रायणो रायमच्चा य माहणा अदुव खत्तिया । पुच्छंति निहुयऽप्पाणो क्हं मे आयरगोयरो ? ॥२॥ २६६. तेसिं सो निहुओ दंतो सव्वभूयसुहावहो । सिक्खाए सुसमाउत्तो आइक्खइ वियक्खणो ॥३॥ २६७. हंदि ! धम्म-ऽत्थ-कामाणं निग्गंथाणं सुणेह मे । आयार-गोयरं भीमं सयलं दुरहिट्ठियं ॥४॥ २६८. नऽन्नत्थ एरिसं वुत्तं जं लोए परमदुच्चरं । विउलट्ठाणभाइस्स न भूयं न भविस्सई ॥५॥ २६९. सखुह्ण-वियत्ताणं वाहियाणं च जे गुणा । अखंड-फुडिया कायव्वा तं सुणेह जहा तहा ॥६॥ २७०. दस अट्ठ य ठाणाइं जाइं बालोऽसरज्झई । तत्थं अन्नयरे ठाणे निग्गंथत्ताओ भस्सई ॥७॥ २७१. तत्थिमं पढमं ठाणं महावीरेण देसियं । अहिंसा निउणा दिट्ठा सव्वभूएसु संजमो ॥८॥ २७२. जावंति लोए पाणा तसा अदुव थावरा । तं जाणमजाणं वा न हणे नो वि घायए ॥९॥ २७३. सव्वजीवा वि इच्छंति जीविउं न मरिज्जिउं । तम्हा पाणवहं घोरं निग्गंथा वज्जयंति णं ॥१०॥ २७४. अप्पणट्ठा परट्ठा वा कोहा वा जइ वा भया । हिंसगं न मुसं बूया नो वि अन्नं वयावए ॥११॥ २७५. मुसावाओ य लोगम्मि सव्वसाहूहिं गरिहिओ । अविस्साओ य भूयाणं तम्हा मोसं विवज्जे ॥१२॥ २७६. चित्तमंतमचित्तं वा अप्पं वा जइ वा बहुं । दंतसोहणमेत्तं पि ओग्गहं सि अजाइया ॥१३॥ २७७. तं अप्पणा न गेणहंति नो वि गेणहावए परं । अन्नं वा गेणहमाणं पि नाणुजाणंति संजया ॥१४॥ २७८. अबंभचरियं घोरं पमायं दुरहिट्ठियं । नाऽऽयरंति मुणी लोए भेयाययणवज्जिणो ॥१५॥ २७९. मूलमेयमहम्मस्स महादोसमुस्सयं । तम्हा मेहुणसंसग्गं निग्गंथा वज्जयंति णं ॥१६॥ २८०. विडमुब्भेइमं लोणं तेल्लं सप्पिं च फाणियं । न ते सन्निहिमिच्छंति नायपुत्तवओरया ॥१७॥ २८१. लोभस्सेसऽणुफासो मन्ने अन्नयरामवि । जे सिया सन्निही कामे गिही, पव्वइए न से ॥१८॥ २८२. जं पि वत्थं व पायं वा कंबलं पायपुच्छणं । तं पि संजम-लज्जट्ठा धारंति परिहरंति य ॥१९॥ २८३. न सो परिग्गहो वुत्तो नायपुत्तेण ताइणा । मुच्छा परिग्गहो वुत्तो इइ वुत्तं महेसिणा ॥२०॥ २८४. सव्वत्थुवहिणा बुद्धा संरक्खणपरिग्गहे । अवि अप्पणो वि देहम्मि नाऽऽयरंति ममाइयं ॥२१॥ २८५. अहो ! निच्चं तवोकम्मं सव्वबुद्धेहि वणियं । जा य लज्जासमा वित्ती एगभत्तं च भोयणं ॥२२॥ संतिमे सुहुमा पाणा तसा अदुव थावरा । जाइं राओ अपासंतो कहमेसणियं चरे ? ॥२३॥ २८७. उदओल्लं बीयसंसत्तं पाणा निव्वडिया महिं । दिया ताइं विवज्जेजा राओ तत्थ क्हं चरे ? ॥२४॥ २८८. एयं च दोसं दद्वुणं नायपुत्तेण भासियं । सव्वाहारं न भुंजंति निग्गंथा राइभोयणं ॥२५॥ २८९. पुढविकायं न हिंसंति मणसा वयस कायसा । तिविहेण करणजोएण संजया सुसमाहिया ॥२६॥ २९०. पुढविकायं विहिंसंतो हिंसई तु तदस्सिए । तसे य विविहे पाणे चक्खुसे य अचक्खुसे ॥२७॥ २९१. तम्हा एयं वियाणित्ता दोसं दोग्गइवइढणं । पुढविकायसमारंभं जावज्जीवाए वज्जे ॥२८॥ २९२. आउकायं न हिंसंति मणसा वयस कायसा । तिविहेण करणजोएण संजया सुसमाहिया ॥२९॥ २९३. आउकायं विहिंसंतो हिंसई उ तदस्सिए । तसे य विविहे पाणे चक्खुसे य अचक्खुसे ॥३०॥ २९४. तम्हा एयं वियाणित्ता दोसं दोग्गइवइढणं । आउकायसमारंभं जावजीवाए वज्जे ॥३१॥ २९५. जायतेयं न इच्छंति पावगं जलइत्तए । तिक्खमन्नयरं सत्थं सव्वओ वि दुरासयं ॥३२॥ २९६. पाईणं पडिणं वा वि उट्ठं अणुदिसामवि । अहे दाहिणाओ वा वि दहे उत्तरओ वि य ॥३३॥ २९७. भूयाणं एसमाघाओ हव्ववाहो, न संसओ । तं पईव-पयावट्ठा संजया किंचि नाऽऽरभे ॥३४॥ २९८. तम्हा एयं वियाणित्ता दोसं दोग्गइवइढणं । तेउकायसमारंभं जावज्जीवाए वज्जे ॥३५॥ २९९. अनिलस्स समारंभं बुद्धा मन्नंति तारिसं । सावज्जबहुलं चेयं नेयं ताईहि सेवियं ॥३६॥ ३००. तालियंटेण पत्तेण साहाविहुयणेण वा । न ते वीइउमिच्छंति वीयावेऊण वा परं ॥३७॥ ३०१. जं पि वत्थं व पायं वा कंबलं पायपुच्छणं । न ते वायमुईरंति जयं परिहरंति

य ॥३८॥ ३०२. तम्हा एयं वियाणित्ता दोसं दोग्गइवड्डणं । वाउकायसमारंभं जावज्जीवाए वज्जए ॥३९॥ ३०३. वणस्सइं न हिंसंति मणसा वयसा कायसा । तिविहेण करणजोएण संजया सुसमाहिया ॥४०॥ ३०४. वणस्सइं विहिंसंतो हिंसई उ तदस्सिए । तसे य विविहे पाणे चक्खुसे य अचक्खुसे ॥४१॥ ३०५. तम्हा एयं वियाणित्ता दोसं दोग्गइवड्डणं । वणस्सइसमारंभं जावज्जीवाए वज्जए ॥४२॥ ३०६. तसकायं न हिंसंति मणसा वयसा कायसा । तिविहेण करणजोएण संजया सुसमाहिया ॥४३॥ ३०७. तसकायं विहिंसंतो हिंसई उ तदस्सिए । तसे य विविहे पाणे चक्खुसे य अचक्खुसे ॥४४॥ ३०८. तम्हा एयं वियाणित्ता दोसं दोग्गइवड्डणं । तसकायसमारंभं जावज्जीवाए वज्जए ॥४५॥ ३०९. जाइं चत्तारिडभोज्जाइं इसिणाऽऽहारमाइणि । ताइं तु विवज्जेतो संजमं अणुपालए ॥४६॥ ३१०. पिंडं सेज्जं च वत्थं च चउत्थं पायमेव य । अकप्पियं न इच्छेज्जा पडिग्गाहेज्ज कप्पियं ॥४७॥ ३११. जे नियागं ममायंति कीयमुद्देसियाऽऽहडं । वहं ते समणुजाणंति इइ वुत्तं महेसिणा ॥४८॥ ३१२. तम्हा असण-पाणाई कीयमुद्देसियाऽऽहडं । वज्जयंति ठियप्पाणो निग्गंथा धम्मजीविणो ॥४९॥ ३१३. कंसेसु कंसपाएसु कुंडमोएसु वा पुणो । भुंजंतो असण-पाणाई आयारा परिभस्सई ॥५०॥ ३१४. सीओदगसमारंभे मत्तधोयणछड्डणे । जाइं छणंति भूयाइं सो तत्थ दिट्ठो असंजमो ॥५१॥ ३१५. पच्छा-कम्मं पुरेकम्मं सिया तत्थ न कप्पई । एयमट्ठं न भुंजंति निग्गंथा गिहिभायणे ॥५२॥ ३१६. आसंदी-पलियंकेसु मंच-मासालएसु वा । आणायरियमज्जाणं आसइत्तु सइत्तु वा ॥५३॥ ३१७. नाऽऽसंदी-पलियंकेसु न निसेज्जा न पीढए । निग्गंथाऽऽपडिलेहाए बुद्धवुत्तमहिट्ठगा ॥५४॥ ३१८. गंभीरविजया एए पाणा दुप्पडिलेहगा । आसंदी पलियंको य एयमट्ठं विवज्जिया ॥५५॥ ३१९. गोयरग्गपविट्ठस्स निसेज्जा जस्स कप्पई । इमेरिसमणायारं आवज्जइ अबोहियं ॥५६॥ ३२०. विवत्ती बंभचेरस्स पाणाणं च वहे वहो । वणीमगपडिग्घाओ पडिकोहो य अगारिणं ॥५७॥ ३२१. अगुत्ती बंभचेरस्स इत्थीओ यावि संकणं । कुसीलवड्डणं ठाणं दूरओ परिवज्जए ॥५८॥ ३२२. तिण्हमनकनयरागस्स निसेज्जा जस्स कप्पई । जराए अभिभूयस्स वाहियस्स तवस्सिणो ॥५९॥ ३२३. वाहिओ वा अरोगी वा सिणाणं जो उ पत्थए । वोक्कंतो होइ आयारो जढो हवइ संजमो ॥६०॥ ३२४. संतिमे सुहुमा पाणा घसासु भिलुगासु य । जे उ भिक्खू सिणायंतो वियडेणुप्पिलावए ॥६१॥ ३२५. तम्हा ते न सिणायंति सीएण उसिणेण वा । जावज्जीवं वयं घोरं असिणाणमहिट्ठगा ॥६२॥ ३२६. सिणाणं अदुवा कक्कं लोद्धं पउमगाणि य । गायस्सुव्वट्ठणट्ठाए नाऽसरंति कयाइ वि ॥६३॥ ३२७. नगिणस्स वा वि मुंडस्स दीहरोम-नहंसिणो । मेहुणा उवसंतस्स किं विभूसाए कारियं ? ॥६४॥ ३२८. विभूसावत्तियं भिक्खू कम्मं बंधइ चिक्कणं । संसारसायरे घोरे जेणं पडइ दुरुत्तरे ॥६५॥ ३२९. विभूसावत्तियं चेयं बुद्धा मत्तंति तारिसं । सावज्जबहुलं चेयं नेयं ताईहि सेवियं ॥६६॥ ३३०. खवेंति अप्पाणममोहदंसिणो तवे रया संजमे अज्जवे गुणे । धुणंति पावाइं पुरेकडाइं नवाइं पावाइं न ते करंति ॥६७॥ ३३१. सओवसंता अममा अकिंचणा सविज्जविज्जाणुगया जसंसिणो । उउप्पसन्ने विमले व चंदिमे सिद्धिं विमाणाइं उवेति ताइणो ॥६८॥ त्ति बेमि ॥ ☆☆☆॥ **धम्म-ऽत्थ-कामऽज्झयणं छुट्ठं समत्तं ॥६॥ ☆☆☆ ७ सत्तमं वक्कसुद्धिअज्झयणं ☆☆☆** ३३२. चउण्हं खलु भासाणं परिसंखाय पन्नवं । दोण्हं तु विणयं सिकखे दो न भासेज्ज सव्वसो ॥१॥ ३३३. जा य सच्चा अवत्तव्वा सच्चा मोसा य जा मुसा । जा य बुद्धेहिऽणाइन्ना न तं भासेज्ज पण्णवं ॥२॥ ३३४. असच्चमोसं सच्चं च अणवज्जमकक्कसं । समुप्पेहमसंदिद्धं गिरं भासेज्ज पण्णवं ॥३॥ ३३५. एयं च अट्ठमत्तं वा जं तु नामेइ सासयं । स भासं सच्चमोसं पि तं पि धीरो विवज्जए ॥४॥ ३३६. वितहं पि तहामुत्तिं जं गिरं भासए नरो । तम्हा सो पुट्ठो पावेणं, किं पुणं जो मुसं वए? ॥५॥ ३३७. तम्हा गच्छामो वक्खामो अमुगं वा णे भविस्सई । अहं वा णं करिस्सामि एसो वा णं करिस्सई ॥६॥ ३३८. एवमाई उ जा भासा एसकालम्मि संकिया । संपयाईयमट्ठे वा तं पि धीरो विवज्जए ॥७॥ ३३९. अईयम्मि य कालम्मि पच्चुप्पन्नमणागए । जमट्ठं तु जाणेज्जा 'एवमेयं' ति नो वए ॥८॥ ३४०. अईयम्मि य कालम्मि पच्चुप्पन्नमणागए । जत्थ संका भवे तं तु 'एवमेयं' ति नो वए ॥९॥ ३४१. अईयम्मि य कालम्मि पच्चुप्पन्नमणागए । निस्संकियं भवे जं तु 'एवमेयं' ति निद्दिसे ॥१०॥ ३४२. तहेव फरुसा भासा गुरुभूओवघाइणी । सच्चा वि सा न वत्तव्वा जओ पावस्स

आगमो ॥११॥ ३४३. तहेव काणं 'काणे' ति पंडगं 'पंडगे' ति वा । वाहियं वा वि 'रोगि' ति तेणं 'चोरे' ति नो वए ॥१२॥ ३४४. एएऽन्नेण अट्टेण परो जेणुवहम्मई । आयारभावदोसण्णु ण तं भासेज्ज पण्णवं ॥१३॥ ३४५. तहेव 'होले' 'गोले' ति 'साणे' वा 'वसुले' ति य । 'दमए' 'दूहए' वा वि न तं भासेज्ज पण्णवं ॥१४॥ ३४६. अज्जिए पज्जिये वा वि अम्मो माउसिय ति वा । पिउस्सिए भाइणेज्ज ति धूए नत्तुणिए ति य ॥१५॥ ३४७. हले हले ति अन्ने ति भट्टे सामिणि गोमिणि । होले गोले वसुले ति इत्थियं नेवमालवे ॥१६॥ ३४८. नामधेजेण णं बूया इत्थीगोत्तेण वा पुणो । जहारिहमभिगिज्झ आलवेज्ज लवेज्ज वा ॥१७॥ ३४९. अज्जए पज्जए वा वि बप्पो चुल्लपिउ ति य । माउला भाइणेज्ज ति पुत्ते णत्तुणिय ति य ॥१८॥ ३५०. हे हो हले ति अन्ने ति भट्टा सामिय गोमिय । होल गोल वसुल ति पुरिसं नेवमालवे ॥१९॥ ३५१. नामधेजेण णं बूया पुरिसगोत्तेण वा पुणो । जहारिहमभिगिज्झ आलवेज्ज लवेज्ज वा ॥२०॥ ३५२. पंचिदियाण पाणाणं एस इत्थी अयं पुमं । जाव णं विजाणेज्जा ताव जाइ ति आलवे ॥२१॥ ३५३. तहेव मणुसं पसुं पक्खिं वा वि सरीसिवं । थूले पमेइले वज्झे पाइमे ति य नो वए ॥२२॥ ३५४. परिवूढे ति णं बूया बूया उवचिए ति य । संजए पीणिए वा वि महाकाए ति आलवे ॥२३॥ ३५५. तहेव गाओ दुज्झाओ दम्मा गोरहण ति य । वाहिमा रहजोग्ग ति नेवं भासेज्ज पण्णवं ॥२४॥ ३५६. जुवंगवे ति णं बूया धेणुं रसदय ति य । रहस्से महल्लए वा वि वए संवहणे ति य ॥२५॥ ३५७. तहेव गंतुमुज्जाणं पव्वयाणि वणाणि य । रुक्खा महल्ल पेहाए नेवं भासेज्ज पण्णवं ॥२६॥ ३५८. अलं पासायखंभाणं तोरणण गिहाण य । फलिह-ऽगल-नावाणं अलं उदगदोणिणं ॥२७॥ ३५९. पीढए चंगबेरे य नंगले मइयं सिया । जंतलट्ठी व नाभी वा गंडिया व अलं सिया ॥२८॥ ३६०. आसणं सयणं जाणं होज्जा वा किंचुवस्सए । भूओवघाइणिं भासं नेवं भासेज्ज पण्णवं ॥२९॥ ३६१. तहेव गंतुमुज्जाणं पव्वयाणि वणाणि य । रुक्खा महल्ल पेहाए एवं भासेज्जा पण्णवं ॥३०॥ ३६२. जाइमंता इमे रुक्खा दीहवट्टा महालया । पयायसाला विडिमा वए दरिसणि ति य । ३६३. तहा फलाइं पक्काइं पायखज्जाइं नो वए । वेलोइयाइं टालाइं वेहिमाइं ति नो वए ॥३२॥ ३६४. असंथडा इमे अंबा बहुनिव्वड्ढिमाफला । वएज्जा बहुसंभूया भूयरूव ति वा पुणो ॥३३॥ ३६५. तहोसहीओ पक्काओ नीलियाओ छवी इ य । लाइमा भज्जिमाओ ति पिहुखज्ज ति नो वए ॥३४॥ ३६६. विरूढा बहुसंभूया थिरा ऊसढा वि य । गब्भियाओ पसूयाओ ससाराओ ति आलवे ॥३५॥ ३६७. तहेव संखडिं नच्चा किच्चं कज्जं ति नो वए । तेणगं वा वि वज्झे ति सुतित्थे ति य आवगा ॥३६॥ ३६८. संखडिं संखडिं बूया पणियट्ठं ति तेणगं । बहुसमाणि तित्थाणि आवगाणं वियागरे ॥३७॥ ३६९. तहा नईओ पुण्णाओ कायतिज्ज ति नो वए । नावाहिं तारिमाओ ति पाणिपेज्ज ति नो वए ॥३८॥ ३७०. बहुवाहडा अगाहा बहुसलिलुप्पिलोदगा । बहुवित्थडोदगा यावि एवं भासेज्जा पण्णवं ॥३९॥ ३७१. तहेव सावज्जं जोगं परस्सऽट्टाए निट्ठियं । कीरमाणं ति वा णच्चा सावज्जं नाऽऽलवे मुणी ॥४०॥ ३७२. सुकडे ति सुपक्के ति सुच्छिन्ने सुहडे मडे । सुनिट्ठिए सुलट्टे ति सावज्जं वज्जए मुणी ॥४१॥ ३७३. पयत्तपक्के ति व पक्कमालवे, पयत्तच्छिन्ने ति व छिन्नमालवे । पवत्तलट्टे ति व कम्महेउयं, पहारगाढे ति व गाढमालवे ॥४२॥ ३७४. सव्वुक्कस्सं परण्यं वा अउलं नत्थि एरिसं । अचक्कियमवत्तवं अचियतं चेव णो वए ॥४३॥ ३७५. सव्वमेयं वइस्सामि सव्वमेयं ति नो वए । अणुवीइ सव्वं सव्वत्थ एवं भासेज्ज पण्णवं ॥४४॥ ३७६. सुक्कीयं वा सुविक्कीयं अकेज्जं केज्जमेव वा । इमं गेण्ह, इमं मुंच पणियं नो वियागरे ॥४५॥ ३७७. अप्पग्घे वा महग्घे वा कए व विक्कए वि वा । पणियट्टे समुप्पन्ने अणवज्जं वियागरे ॥४६॥ ३७८. तहेवाऽसंजयं धीरो आस एहि करेहि वा । सय चिट्ठ वयाहि ति नेवं भासेज्ज पण्णवं ॥४७॥ ३७९. बहवे इमे असाहू लोए वुच्चंति साहुणो । न लवे असाहुं साहुं ति साहुं साहुं ति आलवे ॥४८॥ ३८०. णाण-दंसणसंपन्नं संजमे य तवे रयं । एवंगुणसमाउत्तं संजयं साहुमालवे ॥४९॥ ३८१. देवाणं मणुयाणं च तिरियाणं च वुग्गहे । अमुयाण जओ होउ, मा वा होउ ति नो वए ॥५०॥ ३८२. वाओ वुट्ठं व सीउण्हं खेमं धायं सिवं ति वा । पया णु होज्ज एयाणि ? मा वा होउ ति नो वए ॥५१॥ ३८३. तहेव मेहं व नहं व माणवं न देवदेव ति गिरं वएज्जा । समुच्छिए उन्नए वा पओदे वएज्जा वा 'वुट्टे बलाहए' ति ॥५२॥ ३८४. 'अंतलिक्खे' ति णं बूया, 'गुज्झाणुचरियं' ति य । रिद्धिमंतं नरं दिस्स 'रिद्धिमंतं' ति आलवे ॥५३॥ ३८५. तहेव सावज्जणुमोयणी गिरा ओहरिणी जा य परोवघाइणी । से कोह लोह भयसा व माणवो न हासमाणो वि गिरं वएज्जा ॥५४॥ ३८६. स-वक्कसुद्धिं समुपेहिया मुणी

गिरं च दुष्टं परिवज्जए सया । मियं अदुष्टं अणुवीई भासए सयाण मज्जे लहई पसंसणं ॥५५॥ ३८७. भासाए दोसे य गुणे य जाणिया तीसे य दुट्टाए विवज्जए सया । छसु संजए सामणिए सया जए वएज्ज बुद्धे हियमाणुलोमियं ॥५६॥ ३८८. परिक्खभासी सुसमाहिइंदिए चउक्कसायावगए अणिस्सिए । स निब्बुणे धुण्णमलं पुरेकडं आराहए लोगमिणं तहा परं ॥५७॥ ति बेमि ॥ ☆☆☆ ॥ वक्कसुद्धिअज्झयणं सत्तमं समत्तं ॥७॥ ☆☆☆ ८ अट्टमं आयारप्पणिहिअज्झयणं ☆☆☆ ३८९. आयारपणिहिं लब्धुं जहा कायव्व भिक्खुणा । तं भे उदाहरिस्सामि आणुकुव्विं सुणेह मे ॥१॥ ३९०. पुढविदगअगाणिमारुयतणरुक्खसबीयगा । तसा य पाणा जीव ति इइ वुत्तं महेसिणा ॥२॥ ३९१. तेसिं अच्छणजोएण निच्चं होयव्वयं सया । मणसा कायवक्केण एवं भवइ संजए ॥३॥ ३९२. पुढविं भित्तिं सिलं लेलुं नेव भिदे न संलिहे । तिविहेण करणजोएण संजए सुसमाहिए ॥४॥ ३९३. सुद्धपुढवीए न निसिए ससरक्खम्मि य आसणे । पमज्जित्तु निसीएज्जा जाणित्तु जाइयोग्गहं ॥५॥ ३९४. सीओदगं न सेवेज्जा सिला वुट्टं हिमाणि य । उसिणोदगं तत्तफसुयं पडिगाहेज्ज संजए ॥६॥ ३९५. उदओल्लं अप्पणो कायं नेव पुंछे न संलिहे । समुप्पेह तहाभूयं नो णं संघट्टए मुणी ॥७॥ ३९६. इंगालं अगणिं अच्चिं अलायं वा सजोइयं । न उंजेज्जा न घट्टेज्जा नो णं निव्वावए मुणी ॥८॥ ३९७. तालियंटेण पत्तेण साहविहुयणेण वा । न वीएज्ज अप्पणो कायं बाहिरं वा वि पोग्गलं ॥९॥ ३९८. तणरुक्खं न छिदेज्जा फलं मूलं व कस्सइ । आमगं विविहं बीयं मणसा वि न पत्थए ॥१०॥ ३९९. गहणेसु न चिट्टेज्जा बीएसु हरिएसु वा । उदगम्मि तहा निच्चं उत्तिंग-पणगेसु वा ॥११॥ ४००. तसे पाणे न हिंसेज्जा वाया अदुव कम्मणा । उवरओ सव्वभूएसु पासेज्ज विविहं जगं ॥१२॥ ४०१. अट्ट सुहुमाइं पेहाए जाइं जाणित्तु संजए । दयाहिगारी भूएसु आस चिट्ट सएहि वा ॥१३॥ ४०२. कयराइं अट्ट सुहुमाइं ? जाइं पुच्छेज्ज संजए । इमाइं ताइं मेहावी आइक्खेज्ज वियक्खणे ॥१४॥ ४०३. सिणेहं १ पुप्फसुहुमं २ च पाणुत्तिंगं ३-४ तहेव य । पणगं ५ बीय ६ हरियं ७ च अंडसुहुमं ८ च अट्टमं ॥१५॥ ४०४. एवमेयाणि जाणित्ता सव्वभावेण संजए । अप्पमत्ते जए निच्चं सव्विंदियसमाहिए ॥१६॥ ४०५. धुवं च पडिलेहेज्जा जोगसा पाय-कंबलं । सेज्जमुच्चारभूमिं च संधारं अदुवाऽऽसणं ॥१७॥ ४०६. उच्चारं पासवणं खेलं सिंघाण जल्लियं । फासुयं पडिलेहिता परिट्टावेज्ज संजए ॥१८॥ ४०७. पविसित्तु परागारं पाणट्टा भोयणस्स वा । जयं चिट्टे, मियं भासे, न य रूवेसु मणं करे ॥१९॥ ४०८. बहुं सुणेइ कण्णहिं बहुं अच्छीहिं पेच्छइ । न य दिट्टं सुयं सव्वं भिक्खू अक्खाउमरिहइ ॥२०॥ ४०९. सुयं वा जइ वा दिट्टं न लवेज्जोवघाइयं । न य केणइ उवाएणं गिहजोगं समायरे ॥२१॥ ४१०. निट्टाणं रसनिज्जूढं भद्दगं पावगं ति वा । पुट्टो वा अपुट्टो वा लाभालाभं न निद्विसे ॥२२॥ ४११. न य भोयणम्मि गिद्धो चरे उंछं अयंपिरो । अफासुयं न भुजेज्जा कीयमुद्वेसियाऽऽहडं ॥२३॥ ४१२. सन्निहिं च न कुव्वेज्जा अणुमायं पि संजए । मुहाजीवी असंबद्धे हवेज्ज जगनिस्सिए ॥२४॥ ४१३. लूहवित्ती सुसंतुट्टे अप्पिच्छे सुहरे सिया । आसुरत्तं न गच्छेज्जा सोच्चाणं जिणासासणं ॥२५॥ ४१४. कण्णसोक्खेहिं सद्देहिं पेमं नाभिनिवेसए । दारुणं कक्कसं फासं काएण अहियासए ॥२६॥ ४१५. खुहं पिवासं दुस्सेज्जं सीउणहं अरई भयं । अहियासे अव्वहिओ देहे दुक्खं महाफलं ॥२७॥ ४१६. अत्थंगयम्मि आइच्चे पुरत्था य अणुग्गए । आहारमइयं सव्वं मणसा वि न पत्थए ॥२८॥ ४१७. अतिंतिणे अचवले अप्पभासी मियासणे । हवेज्ज उयरे दंते थोवं लब्धुं न खिंसए ॥२९॥ ४१८. न बाहिरं परिभवे अत्ताणं न समुक्कसे । सुयलाभे न मज्जेज्जा जच्चा तवसि बुद्धिए ॥३०॥ ४१९. से जाणमजाणं वा कट्टु आहम्मियं पयं । संवरे खिप्पमप्पाणं बीयं तं न समायरे ॥३१॥ ४२०. अणायारं परक्कम्म नेव गूहे, न निणहवे । सुई सया वियडभावे असंसत्ते जिइंदिए ॥३२॥ ४२१. अमोहं वयणं कुज्जा आयरियस्स महप्पणो । तं परिगिज्झ वायाए कम्मणा उववायए ॥३३॥ ४२२. अधुवं जीवियं नच्चा सिद्धिमग्गं वियाणिया । विणियट्टेज्ज भोगेसु, आउं परिमियमप्पणो ॥३४॥ बलं थामं च पेहाए सद्धामारोग्गमप्पणो । खेतं कालं च विण्णाय तहऽप्पाणं निजुंजए ॥ ४२३. जरा जाव न पीलई वाही जाव न वड्ढणं । जाविंदिया न हायंति ताव धम्मं समायरे ॥३५॥ ४२४. कोहं माणं च मायं च लोभं च पाववड्ढणं । वमे चत्तारि दोसे उ इच्छंतो हियमप्पणो ॥३६॥ ४२५. कोहो पीइं पणासेइ, माणो विणयनासाणो । माया मित्ताणि नासेइ, लोभो सव्वविणासणो

॥३७॥ ४२६. उवसमेण हणे कोहं, माणं मद्दवया जिणे । मायं चऽज्जवभावेण, लोभं संतोसओ जिणे ॥३८॥ ४२७. कोहो य माणो य अणिग्गहीया माया य लोभो य पवड्डमाणा । चत्तारि एए कसिणा कसाया सिंचंति मूलाइं पुणभभवस्स ॥३९॥ ४२८. राइणिएसु विणयं पउंजे, धुवसीलयं सययं न हावएज्जा । कुम्मो व्व अल्लीण-पलीणगुत्तो परकमेज्जा तव-संजमम्मि ॥४०॥ ४२९. निंदं च न बहुमन्नेज्जा, सप्पहासं विवज्जए । मिहोकहाहिं न रमे, सज्झायम्मि रओ सया ॥४१॥ ४३०. जोगं च समणधम्मम्मि जुंजे अणलसो धुवं । जुत्तो य समणधम्मम्मि अट्टं लहइ अणुत्तरं ॥४२॥ ४३१. इहलोग-पारत्तहियं जेणं गच्छइ सोग्गइं । बहुसुयं पज्जुवासेज्जा, पुच्छेज्जऽत्थविणिच्छयं ॥४३॥ ४३२. हत्थं पायं च कायं च पणिहाय जिइंदिए । अल्लीणगुत्तो निसिए सगासे गुरुणो मुणी ॥४४॥ ४३३. न पक्खओ न पुरओ नेव किच्चाण पिट्ठओ । न य ऊरुं समासेज्जा चिट्ठेज्जा गुरुणंतिए ॥४५॥ ४३४. अपुच्छिओ न भासेज्जा भासमाणस्स अंतरा । पिट्ठमंसं न खाएज्जा, मायामोसं विवज्जए ॥४६॥ ४३५. अप्पत्तियं जेण सिया, आसु कुप्पेज्ज वा परो । सव्वसो तं न भासेज्जा भासं अहियगामिणिं ॥४७॥ ४३६. दिट्ठं मियं असंदिद्धं पडिपुणं वियं जियं । अयंपिर-मणुव्विग्गं भासं निसिर अत्तवं ॥४८॥ ४३७. आयारपण्णत्तिधरं दिट्ठिवायमहिज्जगं । वइविक्खलियं णच्चा न तं उवहसे मुणी ॥४९॥ ४३८. नक्खत्तं सुमिणं जोगं निमित्तं मंतभेसजं । गिहिणो तं न आइक्खे भूयाहिगरणं पयं ॥५०॥ ४३९. अन्नट्ठं पगडं लेणं भएज्ज सयणा-ऽऽसणं । उच्चारभूमिसंपन्न इत्थी-पसुविविज्जियं ॥५१॥ ४४०. विवित्ता य भवे सेज्जा, नारीणं न लवे कहं । गिहिसंथवं न कुज्जा, कुज्जा साहूहि संथवं ॥५२॥ ४४१. जहा कुक्कुडपोयस्स निच्चं कुललओ भयं । एवं खु बंभयारिस्स इत्थीविग्गहओ भयं ॥५३॥ ४४२. चित्तभित्तिं न निज्झाए, नारिं वा सुअलंकियं । भक्खरं पिव दट्ठणं दिट्ठिं पडिसमाहरे ॥५४॥ ४४३. हत्थ-पायपडिच्छिन्नं कण्ण-नासविगप्पियं । अवि वाससइं नारिं बंभयारी विवज्जए ॥५५॥ ४४४. विभूसा इत्थिसंसग्गी पणीयरसभोयणं । नरस्सऽत्तगवेसिस्स विसं तालउडं जहा ॥५६॥ ४४५. अंग-पच्चंगसंठाणं चारुल्लविय-पेहियं । इत्थीणं तं न निज्झाए कामरागविवट्ठणं ॥५७॥ ४४६. विसएसु मणुण्णेसुं पेमं नाभिनिवेसए । अणिच्चं तेसिं विण्णाय परिणामं पोग्गलाण य ॥५८॥ ४४७. पोग्गलाण परीणामं तेसिं णच्चा जहा तहा । विणीयतण्हो विहरे सीईभूएण अप्पणा ॥५९॥ ४४८. जाए सद्धाए निकखंतो परियायट्ठाणमुत्तमं । तमेव अणुपालेज्जा गुणे आयरियसम्मए ॥६०॥ ४४९. तवं चिमं संजमजोगयं च सज्झायजोगं च सया अहिट्ठए । सूरे व सेणाए समत्तमाउहे अलमप्पणो होइ अलं परेसिं ॥६१॥ ४५०. सज्झाय-सज्झाणरयस्स ताइणो अपावभावस्स तवे रयस्स । विसुज्झई जं से मलं पुरकडं समीरियं रूप्पमलं व जोइणा ॥६२॥ ४५१. से तारिसे दुक्खसहए जिइंदिए सुएण जुत्ते अममे अकिंचणे । विरायइ कम्मघणम्मि अवगए कसिणऽब्भपुडावगमे व चंदिम ॥६३॥ त्ति बेमि ☆☆☆ ॥ आयारप्पणिहिअज्झयणं अट्ठमं समत्तं ॥८॥ ☆☆☆ ९ नवमं विणयसमाहिअज्झयणं पढमो उद्देसो ☆☆☆

४५२. थंभा व कोहा व मय-प्पमाया गुरुस्सगासे विणयं न सिक्खे । सो चेव ऊ तस्स अभूइभावो फलं व कीयस्स वहाय होइ ॥१॥ ४५३. जे यावि मंदे त्ति गुरुं विइत्ता डहरे इमे अप्पसुए त्ति नच्चा । हीलंति मिच्छं पडिवज्जमाणा करेति आसायण ते गुरुणं ॥२॥ ४५४. पगईए मंदा वि भवंति एगे डहरा वि य जे सुय-बुद्धोववेया । आयारमंता गुण-सुट्ठियप्पा जे हीलिया सिहिरिव भास कुज्जा ॥३॥ ४५५. जे यावि नागं डहरे त्ति नच्चा आसायए से अहियाय होइ । एवाऽऽयरियं पि हु हीलयंतो नियच्छइ जाइपहं खु मंदे ॥४॥ आसीविसो यावि परं सुरुट्ठो किं जीयनासाओ परं नु कुज्जा ? । आयरियपाया पुण अप्पसन्ना अबोहि आसायण नत्थि मोक्खो ॥५॥ ४५७. जो पावगं जलियमवक्कमेज्जा हासीविसं वा वि हु कोवएज्जा । जो वा विसं खायइ जीवियट्ठी एसोवमाऽऽसायणया गुरुणं ॥६॥ ४५८. सिया हु से पावय नो डहेज्जा आसीविसो वा कुविओ न भक्खे । सिया विसं हालहलं न मारे न यावि मोक्खो गुरुहीलणाए ॥७॥ ४५९. जो पव्वयं सिरसा भेतुमिच्छे सुत्तं व सीहं पडिबोहएज्जा । जो वा दए सत्तिअग्गे पहारं एसोवमाऽऽसायणया गुरुणं ॥८॥ ४६०. सिया हु सीसेण गिरिं पि भिदे सिया हु सीहो कुविओ न भक्खे । सिया न भिदेज्ज व सत्तिअग्गं न यावि मोक्खो गुरुहीलणाए ॥९॥ ४६१. आयरियपाया पुण अप्पसन्ना अबोहि आसायण नत्थि मोक्खो । तम्हा अणाबाहसुहाभिकंखी गुरुप्पसायाभिमुहो

रमेज्जा ॥१०॥ ४६२. जहाऽऽहियग्गी जलणं नमंसे नाणाहुईमंतपयाभिसित्तं । एवाऽऽयरियं उवचिट्टएज्जा अणतंणाणोवगओ वि संतो ॥११॥ ४६३. जस्संतिए धम्मपयाइं सिकखे तस्संतिए वेणइयं पउंजे । सक्कारए सिरसा पंजलीओ कायगिरा भो ! मणसा य निच्चं ॥१२॥ ४६४. लज्जा दया संजमबंभचेरं कल्लाणभागिस्स विसोहिटाणं । जे मे गुरु सययमणुसासयंति ते हं गुरू सययं पूययामि ॥१३॥ ४६५. जहा निसंते तवणऽच्चिमाली पभासइ केवल भारहं तु । एवाऽऽयरिओ सुय-सील-बुद्धिए विरायई सुरमज्झे व इंदो ॥१४॥ ४६६. जहा ससी कोमुइजोगजुत्ते नक्खत्त-तारागणपरिवुडप्पा । खे सोहई विमले अब्भमुक्के एवं गणी सोहइ भिक्खुमज्झे ॥१५॥ ४६७. महागरा आयरिया महेसी समाहिजोगे सुय-सील-बुद्धिए । संपाविउकामे अणुत्तराइं आराहए तोसए धम्मकामी ॥१६॥ ४६८. सोच्चाण मेहावि सुभासियाइं सुस्सूसए आयरिएऽप्पमतो । आराहइत्ताण गुणो अणेगे से पावई सिद्धिमणुत्तरं ति बेमि ॥१७॥ **☆☆☆ ॥ विणयसमाहीए पढमो उद्देसो समत्तो ॥९.१ ॥ विणयसमाहीए बीओ उद्देसो ☆☆☆** ४६९. मूलाओ खंधप्पभवो दुमस्स खंधाओ पच्छा समुवेति साला । साहप्पसाहा विरुहंति पत्ता तओ से पुप्फं च फलं रसो य ॥१॥ ४७०. एवं-धम्मस्स विणओ मूलं, परमो से मोक्खो । जेण कित्तिं सुयं सग्घं निस्सेसं चाभिगच्छई ॥२॥ ४७१. जे य चंडे मिए थद्धे दुव्वाइं नियडीसढे । वुब्भई से अविणीयप्पा कट्टं सोयगयं जहा ॥३॥ ४७२. विणयं पि जो उवाएण चोइओ कुप्पई नरो । दिव्वं सो सिरिमेज्जंति दंडेण पडिसेहए ॥४॥ ४७३. तहेव अविणीयप्पा उववज्झा हया गया । दीसंति दुहमेहंता आभिओगमुवट्टिया ॥५॥ ४७४. तहेव सुविणीयप्पा उववज्झा हया गया । दीसंति सुहमेहंता इह्ठिं पत्ता महायसा ॥६॥ ४७५. तहेव अविणीयप्पा लोगंसि नर-नारिओ । दीसंति दुहमेहंता छाया ते विगलिंदिया ॥७॥ ४७६. दंड-सत्थपरिजुण्णा असब्भवयणेहि य । कलुणा विवन्नछंदा खुप्पिवासाए परिगया ॥८॥ ४७७. तहेव सुविणीयप्पा लोगंसि नर-नारिओ । दीसंति सुहमेहंता इह्ठिं पत्ता महायसा ॥९॥ ४७८. तहेव अविणीयप्पा देवा जक्खा य गुज्झगा । दीसंति दुहमेहंता आभिओगमुवट्टिया ॥१०॥ ४७९. तहेव सुविणीयप्पा देवा जक्खा य गुज्झगा । दीसंति सुहमेहंता इह्ठिं पत्ता महायसा ॥११॥ ४८०. जे आयरिय-उवज्झायाणं सुस्सूसावयणंकरा । तेसिं सिकखा पवहंति जलसित्ता इव पायवा ॥१२॥ ४८१. अप्पणट्ठा परट्ठा वा सिप्पा णेउणियाणि य । गिहिणो उवभोगट्ठा इहलोगस्स कारणा ॥१३॥ ४८२. जेण बंधं वहं घोरं परियावं च दारुणं । सिकखमाणा नियच्छंति जुत्ता ते ललिइंदिया ॥१४॥ ४८३. ते वि तं गुरुं पूयंति तस्स सिप्पस्स कारणा । सक्कारंति नमंसंति तुट्ठा निद्देसवत्तिणो ॥१५॥ ४८४. किं पुण जे सुयग्गाही अणंतहियकामए । आयरिया जं वए भिक्खू तम्हा तं नाइवत्तए ॥१६॥ ४८५. नीयं सेज्जं गइं ठाणं नीयं च आसणाणि य । नीयं च पाए वंदेज्जा, नीयं कुज्जा य अंजलिं ॥१७॥ ४८६. संघट्टइत्ता काएणं तहा उवहिणा मवि । 'खमेह अवराहं मे' वएज्जा 'न पुणो' त्ति य ॥१८॥ ४८७. दुग्गओ वा पओएणं चोइओ वहई रहं । एवं दुब्बुद्धि किच्चाणं वुत्तो वुत्तो पकुव्वई ॥१९॥ ४८८. कालं छंदोवयारं च पडिलेहित्ताण हेउहिं । तेण तेण उवाएणं तं तं संपडिवायए ॥२०॥ ४८९. विवत्ती अविणीयस्स, संपत्ती विणियस्स य । जस्सेयं दुहओ नायं सिकखं से अभिगच्छई ॥२१॥ ४९०. जे यावि चंडे मइइह्ठिगारवे पिसुणे नरे साहस हीणपेसणे । अदिट्ठधम्मे विणए अकोविए असंविभागी न हु तस्स मोक्खो ॥२२॥ ४९१. निद्देसवत्ती पुण जे गुरूणं सुयत्थधम्मा विणयम्मि कोविया । तरित्तु ते ओहमिणं दुरुत्तरं खवित्तु कम्मं गइमुत्तमं गय ॥२३॥ त्ति बेमि ॥ **☆☆☆ विणयसमाहीए बीओ उद्देसो समत्तो ॥९.२॥ ☆☆☆ विणयसमाहीए तइओ उद्देसो ☆☆☆** ४९२. आयरियऽग्गिमिवाऽऽहियग्गी सुस्सूसमाणो पडिजागरेज्जा । आलोइयं इंगियमेव णच्चा जो छंदमाराहयई, स पुज्जो ॥१॥ ४९३. आयारमट्ठा विणयं पउंजे सुस्सूसमाणो परिगिज्झ वक्कं । जहोवइह्ठं अभिकंखमाणो गुरुं तु नाऽऽसाययई, स पुज्जो ॥२॥ ४९४. राइणिएसु विणयं पउंजे डहरा वि य जे परियायजेट्ठा । नियत्तणे वट्टइ सच्चवाई ओवायवं वक्ककरे, स पुज्जो ॥३॥ ४९५. अन्नायउंछं चरई विसुद्धं जवणट्टया समुयाणं च निच्चं । अलद्धयं नो परिदेवएज्जा लद्धं न विकंथयई, स पुज्जो ॥४॥ ४९६. संथार-सेज्जाऽऽसण-भत्त-पाणे अप्पिच्छया अइलाभे वि संते । जो एवमप्पाणऽभितोसएज्जा संतोसपाहन्नए, स पुज्जो ॥६॥ ४९७. सक्का सहेउं आसाए कंटया अओमया उच्छहया नरेणं । अणासए जो उ

सहेज्ज कंटए वईमए कण्णसरे, स पुज्जो ॥६॥ ४९८. मुहुत्तदुक्खा हु हवंति कंटया अओमया, ते वि तओ सुउद्धरा । वायादुरुत्ताणि दुरुद्धराणि वेराणुबंधीणि महब्भयाणि ॥७॥ ४९९. समावयंता वयणाभिघाया कण्णंगया दुम्मणियं जणंति । धम्मो त्ति किच्चा परमग्गसूरे जिइंदिए जो सहई, स पुज्जो ॥८॥ ५००. अवण्णवायं च परम्महस्स पच्चक्खओ पडिणीयं च भासं । ओहारिणिं अप्पियकारिणिं च भासं न भासेज्ज सया, स पुज्जो ॥९॥ ५०१. अलोलुए अक्कुहए अमायी अपिसुणे यावि अदीणवित्ती । नो भावए नो वि य भावियप्पा अकोउहल्ले य सया, स पुज्जो ॥१०॥ ५०२. गुणेहिं साहू, अगुणेहऽसाहू गेण्हाहि साहूगुण, मुंचऽसाहू । वियाणिया अप्पगमप्पणं जो राग-दोसेहिं समो, स पुज्जो ॥११॥ ५०३. तहेव डहरं व महल्लगं वा इत्थी पुमं पव्वइयं गिहिं वा । नो हीलए नो वि य खिंसएज्जा थंभं च कोहं च चए, स पुज्जो ॥१२॥ ५०४. जे माणिया सययं माणयंति जत्तेणं कन्नं व निवेसयंति । ते माणए माणरिहे तवस्सी जिइंदिए सच्चरए, स पुज्जो ॥१३॥ ५०५. तेसिं गुरूणं गुणसागराणं सोच्चाण मेहावि सुभासियाइं । चरे मुणी पंचरए तिगुत्तो चउक्कसायावगए, स पुज्जो ॥१४॥ ५०६. गुरुमिह सययं पडियरिय मुणी जिणवयनिउणे अभिगमकुसले । धुणिय रय-मलं पुरेकडं भासुरमउलं गइं गय ॥१५॥ त्ति बेमि **☆☆☆** ॥ **विणयसमाहीए तईओ उद्देसो समत्तो ॥९.३॥**

☆☆☆ विणयसमाहीए चउत्थो उद्देसो ☆☆☆ ५०७. सुयं मे आउसं ! तेणं भगवया एवमक्खायं—इह खलु थेरेहिं भगवंतेहिं चत्तारि विणयसमाहिट्ठाणा पण्णत्ता ॥१॥ ५०८. कयरे खलु ते थेरेहिं भगवंतेहिं चत्तारि विणयसमाहिट्ठाणा पण्णत्ता ? ॥२॥ ५०९. इमे खलु ते थेरेहिं भगवंतेहिं चत्तारि विणयसमाहिट्ठाणा पण्णत्ता । तं जहा—विणयसमाही १ सुयसमाही २ तवसमाही ३ आयारसमाही ४ ॥३॥ ५१०. विणए १ सुए २ तवे ३ य आयारे ४ निच्चं पंडिया । अभिरामयंति अप्पाणं जे भवंति जिइंदिया ॥४॥ ५११. चउव्विहा खलु विणयसमाही भवइ । तं जहा—अणुसासिज्जंतो सुस्सूइ १ सम्मं संपडिवज्जइ २ वेयमाराहइ ३ न य भवइ अत्तसंपग्गहिए चउत्थं पयं भवइ ४ ॥५॥ ५१२. भवइ य एत्थ सिलोगो—पेहेइ हियाणुसासणं १ सुस्सूई २ तं च पुणो अहिट्ठए ३ । न य माणमएण मज्जई ४ विणयसमाही आययट्ठिए १ ॥६॥ ५१३. चउव्विहा खलु सुयसमाही भवइ । तं जहा—‘सुयं मे भविस्सइ’ त्ति अज्झाइयव्वं भवइ १ ‘एग्गचित्तो भविस्सामि’ त्ति अज्झाइयव्वं भवइ २ ‘अप्पाणं ठावइस्सामि’ त्ति अज्झाइयव्वं भवइ ३ ‘ठिओ परं ठावइस्सामि’ त्ति अज्झाइयव्वं भवइ चउत्थं पयं भवइ ४ ॥७॥ ५१४. भवइ य एत्थ सिलोगो—नाण १ मेग्गचित्तो २ य ठिओ ३ ठावयई परं ४ । सुयाणि य अहिज्जित्ता रओ सुयसमाहिए २ ॥८॥ ५१५. चउव्विहा खलु तवसमाही भवइ । तं जहा—नो इहलोगट्ठयाए तवमहिट्ठेज्जा १ नो परलोगट्ठयाए तवमहिट्ठेज्जा २ नो कित्ति-वण्ण-सद्द-सिलोगट्ठयाए तवमहिट्ठेज्जा ३ नऽन्नत्थ निज्जरट्ठयाए तवमहिट्ठेज्जा चउत्थं पयं भवइ ४ ॥९॥ ५१६. भवइ य एत्थ सिलोगो—विविहगुणतवोरए य निच्चं भवइ निरासए निज्जरट्ठिए । तवसा धुणइ पुराणपावगं जुत्तो सया तवसमाहिए ॥१०॥ ५१७. चउव्विहा खलु आयारसमाही भवइ । तं जहा—नो इहलोगट्ठयाए आयारमहिट्ठेज्जा १ नो परलोगट्ठयाए आयारमहिट्ठेज्जा २ नो कित्ति-वण्ण-सद्दसिलोगट्ठयाए आयारमहिट्ठेज्जा ३ नऽन्नत्थ आरहंतेहिं हेऊहिं आयारमहिट्ठेज्जा चउत्थं पयं भवई ४ ॥११॥ ५१८. भवइ य एत्थ सिलोगो—जिणवयणरए अतिंतिणे पडिपुण्णाययमाययट्ठिए । आयारसमाहिसंवुडे भवइ य दंते भावसंधए ४ ॥१२॥ ५१९. अभिगम चउरो समाहिओ सुविसुद्धो सुसमाहियप्पओ । विउलहियसुहावहं पुणो कुव्वइ सो पयखेममप्पणो ॥१३॥ ५२०. जाई-मरणाओ मुच्चई, इत्थं च चएइ सव्वसो । सिद्धे वा भवइ सासए, देवे वा अप्परए महिइट्ठिए ॥१४॥ त्ति बेमि ॥ ॥विणयसमाहीए चउत्थो उद्देसो समत्तो ॥९.४॥ **☆☆☆** ॥ **विणयसमाहिअज्झयणं नवमं समत्तं ॥९॥** **☆☆☆ १० दसमं सभिकखूअज्झयणं ☆☆☆** ५२१. निक्खम्ममाणाय बुद्धवयणे निच्चं चित्तसमाहिओ भवेज्जा । इत्थीण वसं न यावि गच्छे वंतं नो पडियावियति जे, स भिकखू ॥१॥ ५२२. पुढविं न खणे न खणावए, सीओदगं पिए न पियावए । अगणिसत्थं जहा सुनिसियं तं न जले न जलावए जे, स भिकखू ॥२॥ ५२३. अनिलेण न वीए न वीयावए हरियाणि न छिंदे न छिंदावए । बीयाणि सया विवज्जयंतो, सच्चित्तं नाऽऽहारए जे, स भिकखू ॥३॥ ५२४. वहणं तस-थावराण होइ पुढवि-तण-

कट्टनिस्सियाणं । तम्हा उद्वेसियं न भुंजे नो वि पए न पयावए जे, स भिक्खू ॥४॥ ५२५. रोइय नायपुत्तवयणं अत्तसमे मत्तेज्ज छप्पि काए । पंच य फासे महव्वयाइं पंचासवसंवरए जे, स भिक्खू ॥५॥ ५२६. चत्तारि वमे सया कसाए धुवजोगी य ह्वेज्ज बुद्धवयणे । अहणे निज्जायरूव-रयए गिह्जिजोगं परिवज्जए जे, स भिक्खू ॥६॥ ५२७. सम्मदिट्ठी सया अमूढे अत्थि हु नाणे तवे य संजमे य । तवसा धुणाई पुराणपावगं मण-वय-कायसुसंवुडे जे, स भिक्खू ॥७॥ ५२८. तहेव असणं पाणगं वा विविहं खाइम साइमं लभित्ता । होही अट्ठो सुए परे वा तं न निहे न निहावए जे, स भिक्खू ॥८॥ ५२९. तहेव असणं पाणगं वा विविहं खाइम साइमं लभित्ता । छंदिय साहम्मियाण भुंजे भोच्चा सज्झायरए य जे, स भिक्खू ॥९॥ ५३०. न य वुग्गहियं कहं कहेज्जा न य कुप्पे निहुइंदिए पसंते । संजमधुवजोगजुत्ते उवसंते अविहेडए जे, स भिक्खू ॥१०॥ ५३१. जो सहइ हु गामकंटए अक्कोस-पहार-तज्जणाओ य । भय-भेरवसद्वसप्पहासे समसुह-दुक्खसहे य जे, स भिक्खू ॥११॥ ५३२. पडिमं पडिवज्जिया मसाणे नो भाए भय-भेरवाइं दिस्स । विविहगुण-तवोरए य निच्चं न सरीरं चाभिकंखई जे, स भिक्खू ॥१२॥ ५३३. असइं वोसट्ठ-चत्तदेहे अक्कुट्टे व हए व लूसिए वा । पुढविसमे मुणी ह्वेज्जा अनियाणे अकोउहल्ले य जे, स भिक्खू ॥१३॥ ५३४. अभिभूय काएण परीसहाइं समुद्धरे जाइपहाओ अप्पयं । विइत्तु जाई-मरणं महब्भयं तवे रए सामणिए जे, स भिक्खू ॥१४॥ ५३५. हत्थसंजए पायसंजए वायसंजए संजइंदिए । अज्झप्परए सुसमाहियप्पा सुत्तत्थं च वियाणई जे, स भिक्खू ॥१५॥ ५३६. उवहिम्मि अमुच्छिए अगढिए अण्णायउंछं पुलनिप्पुलाए । कय-विक्कय-सत्तिहिओ विरए सव्वसंगावगए य जे, स भिक्खू ॥१६॥ ५३७. अलोलो भिक्खू न रसेसु गिद्धे उंछं चरे जीविय नाभिकंखे । इह्धिं च सक्कारण पूयणं च चए ठियप्पा अणिहे जे, स भिक्खू ॥१७॥ ५३८. न परं वएज्जासि 'अयं कुसीले' जेणऽन्नो कुप्पेज्ज न तं वएज्जा । जाणिय पत्तेय पुण्ण-पावं अत्ताणं न समुक्कस्से जे, स भिक्खू ॥१८॥ ५३९. न जाइमत्ते न य रूवमत्ते न लाभमत्ते न सुएण मत्ते । मयाणि सव्वाणि विवज्जइत्ता धम्मज्झाणरए य जे, स भिक्खू ॥१९॥ ५४०. पवेयए अज्जपयं महामुणी धम्मे ठिओ ठावयई परं पि । निक्खम्म वज्जेज्ज कुसीललिगं न यावि हासं कहए जे, स भिक्खू ॥२०॥ ५४१. तं देहवासं असुइं असासयं सया चए निच्चहियट्ठियप्पा । छिंदित्तु जाई-मरणस्स बंधणं उवेइ भिक्खू अपुणागमं गइं ॥२१॥ त्ति बेमि ॥ ॥ सभिक्खूअज्झयणं दसमं समत्तं ॥१०॥

☆☆☆११ पढमा रइवक्का चूला-एक्कारसमं अज्झयणं☆☆☆ ५४२. इह खलु भो ! पव्वइएणं उप्पन्नदुक्खेणं संजमे अरइसमावन्नचित्तेणं ओहणुप्पेहिणा अणोहाइएणं चेव हयरस्सि-गयंकुस-पोयपडागाभूयाइं इमाइं अट्टारस ठाणाइं सम्मं संपडिलेहियव्वाइं भवंति । तं जहा—हंभो ! दुस्समाए दुप्पजीवी १ । लहुस्सगा इत्तिरिया गिहीणं कामभोगा २ । भुज्जो य साइबहुला मणुस्सा ३ । इमं च मे दुक्खं न चिरकालोवट्ठाइ भविस्सइ ४ । ओमजणपुरक्कारे ५ । वंतस्स य पडियाइयणं ६ । अहरगइवासोवसंपया ७ । दुल्लभे खलु भो गिहीणं धम्मे गिहवासमज्जे वसंताणं ८ । आयंके से वहाय होइ ९ । संकप्पे से वहाय होइ १० । सोवक्केसे गिहवासे, निरुवक्केसे परियाए ११ । बंधे गिहवासे, मोक्खे परियाए १२ । सावज्जे गिहवासे, अणवज्जे परियाए १३ । बहुसाहारणा गिहीणं कामभोगा १४ । पत्तेयं पुण्ण-पावं १५ । अणिच्चे खलु भो ! मणुयाण जीविए कुसग्गजलबिंदुचंचले १६ । बहुं च खलु पावं कम्मं पगडं १७ । पावाणं च खलु भो ! कडाणं कम्माणं पुव्विं दुच्चिण्णाणं दुप्पडिक्कंताणं वेयइत्ता मोक्खो, नत्थि अवेयइत्ता, तवसा वा झोसइत्ता, अट्टारसमं पयं भवइ १८ ॥१॥ ५४३. भवइ य एत्थ सिलोगो— जया य चयइ धम्मं अणज्जो भोगकारणा । से तत्थ मुच्छिए बाले आयइं नावबुज्झई ॥२॥ ५४४. जया ओहाविओ होइ इंदो वा पडिओ छमं । सव्वधम्मपरिब्भट्ठो स पच्छा परितप्पई ॥३॥ ५४५. जया य वंदिमो होइ पच्छा होइ अवंदिमो । देवया व चुया ठाणा स पच्छा परितप्पई ॥४॥ ५४६. जया य पूइमो होइ पच्छा होइ अपूइमो । राया व रज्जपब्भट्ठो स पच्छा परितप्पइ ॥५॥ ५४७. जया य माणिमो होइ पच्छा होइ अमाणिमो । सेट्ठि व्व कव्वडे छूढो स पच्छा परितप्पई ॥६॥ ५४८. जया य थेरओ होइ समइक्कंतजोव्वणो । मच्छो व्व गलं गिलित्ता स पच्छा परितप्पई ॥७॥ जया य कुकुडंबस्स कुतत्तीहिं विहम्मई । हत्थी व बंधणे बद्धो स पच्छा परितप्पई ॥ ५४९. पुत्त-दारपरिकिण्णो मोहसंताणसंतओ । पंकोसन्नो जहा नागो स पच्छा परितप्पई ॥८॥

५५०. अज्ज याहं गणी होंतो भावियप्पा बहुस्सुओ । जइ हं रमतो परियाए सामण्णे जिणदेसिए ॥९॥ ५५१. देवलोगसमाणो उ परियाओ महेसिणं । रयाणं, अरयाणं च महानिरयसालिसो ॥१०॥ ५५२. अमरोवमं जाणिय सोक्खमुत्तमं रयाण परियाए, तहाऽरयाणं । निरओवमं जाणिय दुक्खमुत्तमं रमेज्ज तम्हा परियाए पंडिए ॥११॥ ५५३. धम्मओ भट्टं सिरिओ ववेयं जन्नग्गि विज्झायमिवऽप्पतेयं । हीलंति णं दुब्बिहियं कुसीला दाढुब्धियं घोरविसं व नागं ॥१२॥ ५५४. इहेवऽधम्मो अयसो अकित्ती दुन्नामधेज्जं च पिहुज्जणम्मि । चुयस्स धम्माओ अहम्मसेविणो संभिन्नवित्तस्स य हेट्ठओ गई ॥१३॥ ५५५. भुंजित्तु भोगाइं पसज्झ चेषसा तहाविहं कट्ठु असंजमं बहुं । गई च गच्छे अणभिज्झियं दुहं, बोही य से नो सुलभा पुणो पुणो ॥१४॥ ५५६. इमस्स ता नेरइयस्स जंतुणो दुहोवणीयस्स किलेसवत्तिणो । पलिओवमं झिज्जइ सागरोवमं किमंग ! पुण मज्झ इमं मणोदुहं ? ॥१५॥ ५५७. न मे चिरं दुक्खमिणं भविस्सई असासया भोगपिवास जंतुणो । न चे सरीरेण इमेणऽवेस्सई अवेस्सई जीवियपज्जवेण मे ॥१६॥ ५५८. जस्सेवमप्पा उ हवेज्ज निच्छिओ चएज्ज देहं, न उ धम्मसासणं । तं तारिसं नो पयलेति इंदिया उवेंतवाया व सुदंसणं गिरिं ॥१७॥ ५५९. इच्चेव संपस्सिय बुद्धिमं नरो आयं उवायं विविहं वियाणिया । काएण वाया अदु माणसेणं तिगुत्तिगुत्तो जिणवयणमहिट्ठेज्जासि ॥१८॥ त्ति बेमि ॥ ॥ रइवक्कचूला नाम चूला पढमा समत्ता ॥ ॥ एक्कारसमं रइवक्कऽज्झयणं समत्तं ॥१९॥

☆☆☆१२ बिइया चूलिया चूला बारसमं अज्झयणं

☆☆☆ ५६०. चूलियं तु पवक्खामि सुयं केवलिभासियं । जं सुणेत्तु सपुण्णाणं धम्मे उप्पज्जई मई ॥१॥ ५६१. अणुसोयपट्टिए बहुजणम्मि पडिसोयलद्धलक्खेणं । पडिसोयमेव अप्पा दायव्वो होउकामेणं ॥२॥ ५६२. अणुसोयसुहो लोगो पडिसोओ आसवो सुविहियाणं । अणुसोओ संसारो, पडिसोओ तस्स उत्तारो ॥३॥ ५६३. तम्हा आयारपरक्कमेण संवरसमाहिबहुलेणं । चरिया गुणा य नियमा य होंति साहूण दट्ठव्वा ॥४॥ ५६४. अणिएयवासो समुयाणचरिया अण्णायउंछं पइरिक्कया य । अप्पोवही कलहविवज्जणा य विहारचरिया इसिणं पसत्था ॥५॥ ५६५. आइण्ण-ओमाणविवज्जणा य उस्सन्नदिट्ठाहड भत्त-पाणे । संसट्ठकप्पेण चरेज्ज भिक्खू तज्जायसंसट्ठ जई जएज्जा ॥६॥ ५६६. अमज्ज-मंसासि अमच्छरीया अभिक्खणं निव्विगईगया य । अभिक्खणं काउस्सग्गकारी सज्झायजोगे पयओ हवेज्जा ॥७॥ ५६७. न पडिणवेज्जा सयणाऽऽसणाइं सेज्जं निसेज्जं तह भत्त-पाणं । गामे कुले वा नगरे व देसे ममत्तभावं न कर्हिचि कुज्जा ॥८॥ ५६८. गिहिणो वेयावडियं न कुज्जा अभिवायणं वंदण पूयणं वा । असंकिलिट्ठेहि समं वसेज्जा मुणी चरित्तस्स जओ न हाणी ॥९॥ ५६९. न या लभेज्जा निउणं सहायं गुणाहियं वा गुणओ समं वा । एक्को वि पावाइं विवज्जयंतो विहरेज्ज कामेसु असज्जमाणो ॥१०॥ संवच्छरं वा वि परं पमाणं बीयं च वासं न तहिं वसेज्जा । सुत्तस्स मग्गेण चरेज्ज भिक्खू सुत्तस्स अत्थो जह आणवेइ ॥११॥ ५७१. जो पुव्वरत्तावररत्तकाले संपेहई अप्पगमप्पेणं । किं मे कडं ? किं च मे किच्चसेसं ? किं सक्कणिज्जं न समायरामि ? ॥१२॥ ५७२. किं मे परो पासइ ? किं व अप्पा ? किं वाहं खलियं न विवज्जयामि ? इच्चेव सम्मं अणुपासमाणो अणागयं नो पडिबंध कुज्जा ॥१३॥ ५७३. जत्थेव पासे कइ दुप्पउत्तं काएण वाया अदु माणसेणं । तत्थेव धीरो पडिसाहरेज्जा आइण्णो खिप्पमिव क्खलीणं ॥१४॥ ५७४. जस्सेरिसा जोग जिइंदियस्स धिईमओ सप्पुरिसस्स निच्चं । तमाहु लोए पडिबुद्धजीवी सो जीवई संजमजीविण ॥१५॥ ५७५. अप्पा खलु सययं रक्खियव्वो सव्विंदिएहिं सुसमाहिएहिं । अरक्खिओ जाइपहं उवेई सुरक्खिओ सव्वदुहाण मुच्चइ ॥१६॥ त्ति बेमि ॥ ॥ बीया चूलिया चूला समत्ता ॥

क्कक्क ॥ बारसमं अज्झयणं समत्तं ॥१२॥

क्कक्क ॥ दसवेयालियं समत्तं ॥क्कक्क